

聽
雨
樓
隨
筆

聽雨樓隨筆卷五

李石梧先生星沅湖南湘陰人道

聲秉蜀臬時冰心鐵面而情深風雅少年時與郭夫人笙
愉唱和刻有詩集未幾夫人歿爲刻其簪花閣遺詩夫人
中秋邀先生和云桂花亭上月娟娟香裊羅衣已字筵十
載佳晨彈指過今宵人月兩團圓清光萬里耐人看燭影
簫聲共倚欄一曲同心一尊酒與君聯句到更闌先生和
云一匳明鏡照嬋娟風送秋香入桂筵寄語嫦娥畱月住
十年才見這回圓大好瓊閨並影看碧雲紅袖繞迴欄問

卿多少同心曲我醉千鍾興未闌閨房之樂可想也郭氏
一門能詩笙愉自敘自其姑祖母兩姑母以及諸姊妹皆
有詩合爲一集刻之誠盛事也姑祖母名步蘊以節聞有
獨吟樓詩二姑名友蘭字素心早寡授經課徒集名嚙雪
山房三姑名佩蘭字芳谷有貯月軒詩女浣香亦工詩
粟芸畦穗廣西臨桂人已丑進士補羅江令調雅安石梧
先生爲京官時典試來川路經羅江同年相見歡然道故
爲芸畦書扇云羅江風景似湘江細雨斜風泛小艘酒市
沿堤花作幔漁家築屋柳爲樁迎秋秔稻熟千頃掠水鷺
鷺飛一雙獨有石梁曲湍處雷霆突起浪驚撞風流瀟灑

寫景如畫芸畦爲辛巳同年錄舊作見示漂泊真如雪裏
鴻年來泥爪遍西東身惟有骨千金值心本無城萬事攻
人客卜歸疑是夢勞生方壯已成翁晚來又送瀟瀟雨惆
悵西窗燭影紅

何申畚夫子重慶府璧山人辛巳山東鄉試座師也在刑
部考軍機時得題後人方構思師已完卷因誤一字換卷
復別作一篇錄畢繳納仍無先之者楊海梁先生謂師吶
於口而敏於心師與徐少鶴夫子皆嘉慶甲子舉人乙丑
聯捷進士鄉會同年又同典試一省亦盛事也少鶴師居
吳門太夫子蘭石先生工詩古文性純孝母病篤願減已

年以增母壽母病痊而先生歿蓋天鑒其誠矣少鶴師克承先志探花及第官內閣侍讀學士禮部侍郎以品學受特達之知終江蘇學院任子綸欽賜舉人申翁夫子自江西南康府歸林下在京時同部相善者來川爲上憲從未謁見干以私子鱗拔貢生爲三臺縣學博鋌在黔爲府經歷新陞婺川縣知縣

嘉定郡守邵蓮溪先生勸山東濟寧人辛巳壬午聯捷進士分發湖北以同知陞補四川嘉定署故有宋梅生修築池亭地迫狹乃於東偏鑿大池種蓮建亭以小艇通來往旁築土山臨水建高閣作記甚詳咏小山云全無倚傍自

成勢不要孤高太絕人贈呂彥臣云舊雨祇宜才子伴新
山不借古人名水亭云風來影蕩重簾綠月照光浮四壁
金又云載酒船歸殘照外放衙客話白雲閒風流足繼梅
生矣前後遊凌雲山有詩二首東坡不作漢嘉守畱下凌
雲待我遊湍急滙爲三峽險地高閱盡九州秋夕陽入水
翻巖脊嵐翠過江擁郡樓却喜民安官事少清風滿抱緩
歸舟訟庭花落鳥聲幽勸我凌雲作後遊酒好還同諸客
醉年豐喜見七城秋呼僮徧覓竹間路抱鶴閑眠水上樓
燈火萬家江一線滿山明月送歸舟

沈南村增煇華陽孝廉前崇寧令沈東里之長孫也隱居

課讀雖城市有山林之趣趙竹菴訪之作詩邀同人和南
村答詩云松菊非三徑蓬蒿豈一廛談經聊下榻容膝類
牽船客遇詩中傑情移海上連新詩來素壁華藻燦雲烟
吳江同震澤梓誼不尋常火慕才人筆纔登君子堂坐談
心共瞻相視鬢誰蒼動我扁舟興湖山憶故鄉

署鄧都有地去縣二百里插入湖南與利川接壤亂山叢
雜賊匪出沒界在兩省難於搜捕聞嘉慶閒川楚教匪滋
擾利川晏如忽有道人至縣勸民乘機爲亂眾不從道人
曰吾能使爾飛空駕雲官兵不能傷也問以術令取數鍋
至煎水加藥使眾洗手足俄皆升至半空飄然隨意所至

愚民大喜奉爲師聚眾蜂起官兵至術不靈道人不知所往殲戮無遺殆劫數歟吾邑韓于佃名厥田官其邑見白骨徧野問知其故

孫士貞號幹亭山東壽光人歲貢康熙閒爲夔州通判歸里述其風土孫青士記以詩云千盤鳥道掛城邊萬尺晴江落戶前瓜果三生未到眼鱗魚經歲不登筵官民盡結依巖屋人鬼同爭下峽船况是水泉不可飲從來險惡至今傳自註范石湖云夔水不可飲讀詩令人失笑當時國家定鼎未及百年諸事草創故安儉樸之風今則異於所云矣惟地之險惡如故耳

離達縣七里有蔣孝子農夫也嘗刲肉療父母疾父歿盡哀廬墓母歿晝夜哭七日勺水不入口昏昧中有人掖之登天與諸神遊七日復送回人間已七年矣不入家在村外小山破廟中是夜山旁諸村落見山上燈火照耀幡幢布滿音樂不絕天明往視一無所有惟孝子趺坐神祠眾問其由大驚斂貲建廟殿旁築小屋栖之戶外鍵二童司啓閉終日不飲食能先知曰帝命吾療一方疾病山上故無水手鑿小池水滿其中以飲病者立愈男婦乞求絡繹於道時綏定太守吾鄉孫公東屈疑妖言惑眾往見請入署暫住納諸靜室閱七日啓視容色如常乃敬服以鼓

樂送歸爲懸匾額冬月孫公誕日使童子送盆植小桃枝
葉茂盛一桃甚巨曰師以此爲公壽明年生子矣時孫公
無嗣至期果然幕友沈倬雲曾至其邑先使人達意齋三
日而後往歷言無隱出其臂肉黑有白字隱起曰人中孝
一卦肉處生肉成佛象初問疾者至卽呼其名知其居里
後厭喧囂不與見但令自取水去家中惟其子許見餘不
令人當倬雲見時偕一佐雜官某某有疑相質孝子云官
近行某事最好確能道之其事甚奇而見者不一非誣也
至今尚在謂之活菩薩

鄆縣許水南高隱士而上楊撫軍一書通今博古于四川

制夷情形時勢見之透徹非孤高迂癖一流也韓輅過其

廢宅有感云丁卯橋西處士莊昔年長此戀壺觴千尋老

樹藏幽壑十里溪雲壓短牆聞道梅花香似海

水南軒有
梅海鶴天

四字聽殘鶴唳月窺廊茲來未減清狂與落日無邊蔓草荒

臺榭都歸想像中百年佳話付清風愁看檻外生禾黍方

信人間有困窮鷺鴨喧呼來水面牛羊次第入芳叢天平

於女不爲薄此語辛酸竟一空最愛襟懷色色真風流猶

憶坐中春也曾歌笑如狂士却使心脾似飲醇秋水月明

爭活潑西山雪後見嶙峋海天梅鶴無消息何處仙源更

問津讀書萬卷腹便便海外三山直造巔誰信昌黎才不

第

水南舉博學鴻詞科未就

並教李廌老無緣

屢鄉試亦不第

喬林野日荒荒

下極浦寒鴉故故旋甘苦卽今同逝水那能搔首問青天

少陵有子讀其詩爲問先生幾個兒天道難憑生落魄文

章不遇死還奇遺編忍信風吹籟勝事真同雨作泥猶幸

故人毛司馬收將什一付青梨

司馬公有半畝居士集行世內附水南集二卷

君

骸尙未卜佳城野岸村橋草梗橫永夜月明蛩自響極天

露下鳥無聲難逢公子扁舟渡誰寫書生薄命情我欲往

尋河上友竟搜遺稿續長庚

時櫓尙停犀浦河岸

妻子分馳幾處忙

天心福善亦荒唐藏金縱少謀生計積德寧無裕後方身

世已成今昔恨田園空令馬牛忙眼前刺事惟黃壤一任

西鄰說短長

有謂水南爲梅花所誤悉伐作薪故言此

此身飄泊似浮萍錦里

重來歲幾更白髮已看成老朽青山何處好逢迎蕭蕭郭外尋顏蹢默默風前悼曼卿生死不同桑海變輸他太上獨忘情

彭星舫瑛河南夏邑人嘉慶戊寅舉人初補巫山告歸作七絕數首風韻最佳袖江帶峽賦歸與還我西陂舊釣徒猶及鮑蒲好時節算來也可抵蒹蘆惆悵陽臺事盡荒懶隨宋玉續高唐依依略似吾廬愛十二峯前一草堂張騫謫宦豈封侯

謂湘帆坐藏未還

羅隱彫零

仁村亦仙去

鄭谷休屈指同岑諸宦侶幾人黑海得迴舟縣郭環山轉厭山何如平楚

且耕烟歸裝笑我囊羞澁不買青山那計錢也曾旗扁闌
喧闐士女爭傳父母官只有此心瞞不得博名猶易副名
難筍輿側臥竹簾垂雄楚樓邊向曉時十里嫩涼吹夢醒
插秧聲裏雨如絲急需料理病中身敢向烟霞作隱淪燭
武慙無分寸報只緣臣壯不如人記得城南老樹村年年
菘韭佐盤殮生無肉相偏生鄙還是從頭咬菜根後至川
補仁壽陞同知去蜀

陳春腴巖涪州人仲玉之族也道光辛卯進士入翰林改
官御史由給事中檢發江蘇以道員用現署常鎮道少從
陳叔裴學叔裴名晉歲貢生學老文鉅富有藏書四方從

學之士甚眾入館選登賢書者指不勝屈有松下讀書圖
題咏甚夥春腴始入詞林題之云我聞任彥昇家貧聚書
萬卷羅縹紱又聞屠赤水松影深處閒誦離騷與經史人
生得此第一樂抱膝孤吟殊不惡紙上古人卽賞心况有
松風答巖壑松陰低覆石影敲花香入座芸香隨誰解此
意領此福吾從父也亦吾師憶昔少時學問字邊腹便便
五經笥心知臣叔已不癡三十年來舊名士笙簫六籍簡
百家雪帷燈案幾韶華青袍尙滯劉蕡第黃卷長攜皇甫
車書何淫傳何癖如公讀書真結習傳來阿堵神繪以周
仿筆瑤函細帙綴烟哀置身宜在娜嬛室展公圖拜公度

公字叔裴意何如我就裴公爲公書謂才不長貌不揚而
乃功名兼將相公顏潤經腴公狀七尺軀從古詩書卽經
濟靈臺一片公何輪呼松一長嘯十八公爲公兆他年若
畫綠野堂添我手持一卷旁侍中郎教春腴富於學工駢
體詩亦動輒百韻第工而遲嘗與友人同舟赴省試共座
聯句他人已得句春腴猶自推敲友人以箸敲几故爲催
逼春腴怒掀翻几案流涕曰何受人侮若此性孤僻拜之
或不答寄之書或不覆惟佞佛於心經逐句分疏兼咏以
詩雖居官每日刻香讀書香不盡他務不遑也人多笑其
迂不顧常置黃黑豆兩器於前以自考功過云聞春腴家

赤貧質鈍而好學不倦大考皆居二等願以詞臣顯外官
非其好也

李雨村載吾淄蒲松齡先生過青石關詩以爲卽墨人誤
矣先生號柳泉著聊齋志異幾於家有其書何未詳其爲
何許人詩云身在甕盎中仰看飛雁度南山北山雲千株
萬株樹但見山中人不見山中路樵者指以柯捫蘿白茲
去勾曲上層霄馬蹄無穩步忽然聞犬吠烟火數家聚挽
轡眺來處茫茫積翠霧先生詩集粗閱一過此首確是先
生手筆雨村以爲專學漁洋非也當時先生與同邑高侍
郎念東唐太史豹岩張貢生崑崙山人篤慶及家銀臺公

結詩社無一趨步漁洋者漁洋弟子徧天下未覲面而奉爲圭臬者亦不乏人柳泉與漁洋往來尺牘余盡見之惟問答志異一書漁洋題贈七絕先生亦答以絕句餘無有也漁洋請爲念東先生序詩不許豹岩先生於漁洋爲翰林前輩漁洋晚與山人唱和山人意氣豪放未嘗屈就弟子之列漁洋推爲冠古之才當與顏修來田山薑諸先生匹敵家銀臺公雖與漁洋有年誼而意氣各不相下柳泉先生以諸生傲然公卿閒未肯俯首隨人也諸公詩集多入四庫全書柳泉先生詩未刻不知兩村於何處見之所載詩亦非其至者錄二首足見其概河堤遠眺云黃河橫

卷半天流河外斜陽繫客舟歧路徘徊思弟妹十年患難
重交遊池中芳草來春夢笛裏梅花起暮愁雲水欲窮千
里目時時風雨一登樓湖外含烟烟似水湖中凝水水如
烟灘平細浪移沙岸日落孤村繫客船漁艇暮燈猶泛泛
桃花春色自年年長河北去帆無數低盡寒空綠接天視
漁洋風格奚似嘗見他書所載亦或以張篤慶爲平原人
疑刻者之訛坊本未可據也

洪雅令張霞泉錫路浙江鎮海人道光丙戌進士在川刻
其外大父謝崑暉候濤山房吟草謝名佑琦自號憩真攻
詩古文詞遊幕嶺南性豪爽好飲酒結客遊踪所至文人

傾倒朝雲捧硯圖云海棠泣露東風溼先生已在前軒立
瞥見嬌姝冉冉來松煙磨就春蔥執如圭端拱禁鼓斜玉
靨輕盈拂曙霞不知染畫書經卷一笑遲遲到絳紗答外
孫張錫路索詩稿五古甚長霞泉和云翹首梅花嶺迢迢
五千里懷人不相見引領長已矣嗟我外王父自號憩真
子飄泊嶺海閒著書尺有咫名噪日南聲價高洛陽紙示
我詩一編淪肌復浹髓平淡由天真縱橫具妙理乍如天
臺僧絕粒形不毀又如西來佛低眉大歡喜人生若舜華
朝榮夕已萎惟茲身後名爲可久長耳公今老風塵非隱
復非仕才奇窮亦奇運否道不否夜郎流太白錦江困子

美古今同一慨奕葉終仰止小子本無知生長窮鄉鄙春
竈亂蠹生秋案枯螢死胸襟旣未超吐辭亦多俚墮入塵
網中一蹶不復起所賴詩興來別有峯稜峙自顧無師學
無以窺蘇李詎知尺素書流到門前水示我作詩源導我
學詩軌虞廷言志訓宣聖無邪旨頓開茅塞心不盡薪傳
指更勞誨諄諄學術崇本始相勸以道德相戒以邪侈謂
爲有夙根斯言吾實恥自惟樗櫟材幸叨宗工庀所慙巴
人歌陽春不得擬願請回一顧勿作門外視更請下一語
亦復非渣滓爲人與爲詩不分彼與此南風雅頌中忠孝

節義是

末句用原作

監錦江書院黃秋坪學博云友人楊孝廉年逾四十矣計偕入都半夜披讀未寢忽有美婦入心念非鬼卽狐若無覩婦手掩卷又近身撫摩迄不動婦笑曰固知君是正人然何必如此拘迂楊正色曰吾有母年八十矣臨行諄囑毋妄爲去家雖遠豈敢欺母於不見乎婦肅然起敬曰眞君子也前吾猶有邪心今伏矣願相與爲友何如曰可共談詩文娓娓可聽索楊文藝觀之曰大體是矣未能投時好也願稍刪削以盡切磋可否楊首肯乃援筆更易數字甚有理致自是往來無閒楊問休咎云弗知卽知亦未可洩但謂楊福命薄耳後竟不第秋坪曾見其所改文字體

秀逸飄飄有仙意

南川令觀葦杭成滿洲瓜勒嘉氏有兄早卒嫂王依孺人
念翁鰥而無子請爲翁繼娶生葦杭七月而翁歿與姑撫
孤成立葦杭爲令時嫂歿已久以子鳳瑞爲兄後乃作憶
兒時哀辭至情悱惻讀之動人音節逼真古樂府也憶兒
時羣兒戲羣兒有父遺餅餌歸問母與嫂吾父在何地母
泣未言嫂垂淚解一母曰嗟爾兄總角失所恃十五娶汝嫂
中饋出十指兄能三餘讀父書泥金甫捷芳蘭枯爾嫂血
淚紅高堂痛有翁解二掩涕痕慰鰥獨庭前奉甘旨房中飯
脫粟微冷無弦琴泣涕請重續一片血誠翁感孚媼婦爲

翁迎新姑

解三

吾入爾門來一見心相契禮在別姑媳情親

宛姒娣問年孰爲長媳少姑一歲

解四

期弄璋偏弄瓦聲

呱呱驚散盈庭來賀者爾父吞聲哭爾嫂笑可掬思飯得

粥終勝枵腹婆娑有華朶轉瞬看結長生果

解五

爾父繼生

爾手顫心冲冲焚香答上蒼燭插香爐中有子可望繼吾

宗成名那計見當躬乳兒肌膚赤老父頭顱白

解六

明年一

病入膏肓嬌兒戲笑暝枕旁呀呀抱父如抱娘不知病父

中心傷永訣惟爭頃刻光

解七

吾延殘喘忍不死只爲汝肉

一塊耳淚珠何物差堪擬雨注梅時冰結霜裏千里湘江

水

解八

姑媳茶蓼撫汝襁褓年年曬書望汝學飽撫孤多撫

叔少求叔得叔撫叔而尤少之少苗秀而實宜將本保儻
無催耕何有晚稻昔有韓侍郎爲嫂期素綰今有胡觀察
雲爲嫂具疏稿汝若能得五華封謹乞殊恩賜汝嫂親恩
固爲根嫂恩亦非杪諸友題咏皆不如原唱發於至情故
也君工篆刻楷書全似漢隸古氣盈紙喜篆書大壽字贈
人道光二十年春委入黔買鉛以親老不願行扇頭書一
詩云怕聽驀云去逡巡不忍行兒身牛馬走母髯雪霜盈
欲泣悲無淚呼天禱咽聲臨歧都不語惟囑報安平令人
不忍卒讀遂告病歸

書碩農云初來川時旅壁有題字云館壁題詩佳作甚多

匆匆不及和語店主勿塗去俟再過補之也未云某年從父自浙官蜀十三齡女史劉漢青題晉省徧訪浙中諸公皆不知其人後遇某云有之是佐雜某之女又人間某云此女父亡後賣與人爲妾後復流落悲哉幼有雅懷長而失所至于此極紅顏薄命才女更酷爲賦此詩珠投濁水失光晶恨不搜取降六丁碩農爲我感喟興旅壁曾覘墨縱橫中有數行照眼明婉婉女史方弱齡自言隨宦一宵停由浙入蜀從此經最愛過客詩句清異日重遊期載賡鳳凰飛去遺彩頰入門瞥見惜娉婷玉質未覩心憐卿拂拭依稀認小名往來胸次如絲縈執裾問訊徧錦城空江

無迹浪打萍席香三日憶郵亭千古怪事吁可驚琴或供
薪鶴遭烹飛花落溷沾穢腥頻覺何處珠淚傾有客傳語
未忍聽復覩題壁悲不勝初言豪門賦小星繼落風塵無
超騰那堪回首百感生吟絮咏琴心自矜顧影徘徊仙骨
輕若箇夫壻龍可乘蜀道艱難已堪憎旅館畱題對殘燈
想像芳華歲頻更約略窈窕門尹邢宜貯金屋護雲屏胡
爲糞壤置瓊英將無才富心瓏玲刻劃盡巧天所懲窗外
細雨蕉葉零酸風蕭瑟穿疎櫺若有人兮呼欲應翠袖單
寒影伶仃高懷雅抱得未曾惜無妙句書吳綾祇今壁上
墨猶馨十三女子劉漢青以詩視碩農碩農覆云俟再考

得實乃爲有據蓋恐貽累於漢青也詩人忠厚之意亦謹

慎之至紀之存疑可耳

碩農名綸正藍旗漢軍壬午進士

梁士俊號石民山東厯城人長鬚偉軀與四川方伯尹竹農先生濟源幼同學庚申舉人同年先後官於蜀雖親密不以私謁補金堂令以疾卒題楊味禪側理紙云蠻箋莫向益州論晉代風流喜尙存巧製本從南越貢縱橫細認海苔痕萬番榮賜玉墀前壯武書成湖往年故紙堆中聲價重人間又幸得流傳燕市攜歸什襲藏開函珍重倍琳琅先生傳物司空匹續志應題字幾行紋如波縐更敲斜真贗須憑賞鑑家記取升菴文史富紙香能辨密蒙花來

川時石民年最長有老成風範

李謙號挹谷甘肅秦安進士補鄴都令道光十六年入黔
買鉛沿途得詩一冊有句雲連鳥撒千山黑天入羊腸一
線青餘多刻露不涉庸熟以母老告歸作七律二首別諸
同人

錢香士忻和雲南人乙未進士兩署屏山陞務關同知題
聽梅玉簪劇數絕記其一云良緣拚向此生休一度梅香
一度愁不信風霜久摧折玉簪仍上美人頭有陣雲立馬
圖題者甚多

浙江淳安何咸宜號壽泉優貢生補冕寧令調華陽著有

詩集未梓過苦水鋪云人苦人不知水苦人知之今我飲
水水不苦或者苦水有甜時宿荏平聞琵琶聲云絲竹中
年悵夢魂那堪一曲對芳樽請看司馬青衫上淚點多於
舊酒痕嘗得初頤園尙書家所藏趙忠毅公鐵如意上有
銀鏤銘云其鉤無鐵廉而不剌以歌以舞以弗若是折維
君子之器也趙南星凡小篆二十六字背有天啓元年夏
製六字下有五嶽真形圖五篆形徵詩題咏甚多原唱云
世上不如意事常八九古之君子處之惟順受人卽云亡
青史存鐵亦可磨名不朽有明太阿柄倒持舉朝半屬魏
之私排擊東林諸正士趙公削籍由義兒嗚呼我公天生

有勁節百鍊精銅經百折忠肝義膽難銷磨廿六字銘一

枝鐵用汝表直叩九重用汝觸邪抗四凶銳意澄清慰中

外指揮政府時從容太白之星夜睽睽我公拜疏擊大奄

寶硯與鐵並堅貞事成策功否同貶

公東方未明硯銘曰殘月暉暉太白睽睽

雞三號更五點此時拜疏擊大奄事成策汝功否則同汝貶

天鑒有錄設網羅雁門戍

去公荷戈恨不親碎逆豎腦唾壺擊缺柰若何嗚呼忠毅

事事不如意忠毅年年鑄此器我得此柄於京師上有天

啓元年字是年辛酉非壬申願與好古之士審欵識

趙公如意

非一阮芸臺制軍所咏爲天啓甲子製施念曾宛雅所載爲萬曆戊申製天啓壬戌製者在吾一簣處天啓癸亥所製在陸丹叔處按張白華亦有一柄未知何年製

林戟門振槩宰中江文弱如不勝衣誠於事神朔望祭祀
必齋戒沐浴道光九年八月丁祭是夜斗山書院山長李
福源夢立西廡階上觀禮忽有數人前導紅旗墨書四大
字旗高不能辨爲何字問爲誰答云孔聖人使漆雕開來
受祭敬視之身不甚高面黑而腴冠青方巾服大袖藍袍
惟足下履似今皂靴見其直入大成殿方思待其出敬問
忽醒聞贊禮奏樂聲未已也

成都相如故宅有琴臺掘其下得甕數十蓋空其下以響
琴用意深微何其韻而雅也卓王孫故宅掘其下亦得二
甕口小僅容一錢腹大可容數石蓋撲滿最巨者中貯五

銖錢無數何其俗而愚也咏之云自是文園癖好琴高臺
廢後見精心美人名士真知己絃外餘音仔細尋太息王
孫慣積財五銖何意委塵埃還思卜式真高見能爲官家
助費來

卓王孫故
宅在邛州

長壽李少峯部郎詩才敏捷率意口占俱有風趣嘗與友
人作會翻韻本一拈平字一拈仄字約安於句中第幾字
得酸信二字安於第五字題爲孕婦句云今年梅子酸尤
甚入月桃花信不來渾雅得之俗題爲難限以對待尤爲
工絕憶在濟南同人亦以此爲戲得脫之二字題爲送客
有云君今已脫風塵外我欲從之水石閒服其句之瀟灑

絕無牽強之迹又有以逐湖二字作對安於句之第二字者題爲述懷有云徵逐安能隨若輩江湖誰與訂同心黃巽甫與幕友拈句必用登高二字作聯甚多僅記其一云禾未登場米價高出句亦不記憶

楊纘亭山東壽光人初補興文陞我邊撫夷通判素不爲詩來川始有作成集五古質樸蒼鬱錄其登惡戾坎云出郭步翠微雲峯豁朝霽迤邐過龍巖山名鳥道盤空繫插天

排礪砢騰雲駕埤垵蛇走陰霾冰雪滋瘴癘繚曲石磴迷榛莽無邊際到此神瑟縮躡足惕若厲憶昔萬厯朝都蠻偕帝制盤據九絲城凌霄作扞蔽梟獍跳陸梁豺虎肆

吞噬蕩搖我邊陲莫遏駸駸勢崛起會中丞

諱省吾字三甫號確菴以

都御史撫四川

奮武怒裂眦人任虜氛惡生民曷克濟選將定謀

猷督師檄精銳誓飲都督山削平靖妖沴巉巉惡戾坎五

斗蠻資

扞衛險接望天均

地名

九泥可塞閉一鼓奮臂登膽

壯非疲敝攀藤陟危梯士卒競策勵從此等破竹風聲驚

鶴唳廓清四百里凱撤末期歲豈曰拓土疆原思奠民麗

我來尋崎嶇弔古憑灑涕當年夷患深羣生畏懍懍眾論

聚訟紛剿撫相鑿杓剿徒糜餉糈撫尤耗金幣狡獪恣蹂

躪流毒延五世

謂自成化以迄隆慶

偉哉平蠻功仗鉞掃星彗惟斷

謀乃成惟專志不替天險終可升壯猷誰能繼是在專聞

者毅然決大計至今闢荆棘往來無蹇滯訐謨奠邊徼版
圖歸輿隸明鑒原非遙所關豈瑣細努力拾屑級僕夫共
牽曳山巔忽曠然英風襲衣袂纈亭名玉堂戊寅舉人

漢兵十三萬討平
山蠻卽興文地

道光十六年攝篆鄧都舊名豐都宋時豐旁加邑遂爲鄧
都俗傳爲冥府有陰王二仙於此修真因陰王遂訛爲閻
王并云每歲縣令製刑具投井中既至其地訪問無此事
惟平都山上古井在關帝廟前無水亦不甚深鐵籠罩之
別有閻羅廟氣象森嚴上層爲仙都觀高殿軒豁江山在
目雲樹杳靄頗爲巨觀旁連小閣塑陰王二仙對局顧晴

沙觀察有詩甚佳以八分書紙屏王方平陰長生沽濁酒
與爾傾爾騎白鶴吾長鯨爾吹鐵笛吾鳳笙江風吹起江
月明吾欲醉爾自醒醒時應憶醉時事醉中可以忘吾情
日月星辰挂巖戶不知戶外蛟龍舞唯有一桮與終古吾
將與爾終一桮一着饒爾先天行憑欄大喚局中急江水
無波空自清鄒小山云其師陳東山官翰林每日過午卽
不見客默坐一室治陰事偶言某日某當死果驗其卒也
預刻期囑家人備後事至期云鄧都差來接遂卒又徐公
從治萬厯癸卯舉人丁丑進士後爲山東巡撫崇禎七年
四月在萊州死孔李之難時肥城書吏以病死數日復生

言閻羅命之取八十人姓名厯厯在陰府造冊陰府門聯
曰大善莫過於孝大惡莫過於淫所造乃七省輪迴冊冊
分黃黑二道不下數十萬人八旬始造畢閻君卽遣持書
赴萊州請徐公四月二十日巳時到任騎驢進萊城門見
門外步兵約一千哨官三四十員惟少中軍臨時選用又
見大旗鼓數隊五色馬共八匹以爲導進門詣都察院傳
請至三次方見徐公在內書室中坐見其憂國之念形於
面目旁有古書二套劒一口端硯一方几上菜豆湯一碗
徐公看書後遂發回書令候起身飲湯畢卽起行牌行四
川成都府鄧都縣到任所過地方城隍土地迎接三十里

進察院時各神卽投造完文冊書吏姓刁名守宗見秦夢
皋南窗新記

王山甫仲選漢軍乙未進士補南部令現任成都陞合州
牧不多作詩七古有奇氣題錢香士陣雲立馬圖云儒生
未上治安策當思射下天狼消兵革文章經濟歸實用草
木知名人懷德同年有錢君倣儻氣凌雲讀書何止破萬
卷筆陣橫厲抵千軍銘心欲與古人齊牛刀新拭試朱提
朱提邑小近夷疆山蠻獷悍屢跳梁大吏知君才力強促
君攝篆作堵防堵防無那當三面烽火夷氛時時見風聲
鶴聲動哀聲誰當戎幙來酣戰羨君防賊似防川補苴罅

漏碣卡連長城橫絕劃中外老罷當路孰敢前擒賊擒王
計已決翻身上馬探夷穴絕壁層巒閱歷深征鞍冷慘蠻
疆雪倚盾草檄文下馬作露布文人餘事不足言惟茲履
危蹈險展圖有餘慕君不見古來將相屬儒生禮樂干戈
佐治平迂儒習經不習事始遣人間畫餅名君遇盤根別
利器能充所學爲撫字管絃暫輟銘刀斗摧鋒破敵出循
吏循吏功績新好手爲寫真猶見當時怒髮噴無怪獠獍
奔絕塵如君不愧讀書人同人題者未之或先

屠春林號薌洲以學博陞縣令分發來川出都時有畱別
七律數首刊示同人素遊阮芸臺先生之門作詩古文甚

富俱未刻行自書啼烏詩一首見示字句詰曲蓋有意摹古者篇長不具錄補南部令到任十日遽卒過嚴灘有詩云臺上星光大舟前霧氣低客懷消不得一路畫眉啼薌洲江蘇山陽人癸酉拔貢癸卯共事秋闈

顧世燾號西園河南長葛縣嘉慶丁卯舉人大挑知縣初官湖北服闋來川補慶符惴惴無華平居耽理學如洛學編等每有心得輒繫以詩詞取達意實未究心風雅也同人詩酒之會亦勉爲酬和錄其二仙菴餞春看芍藥云浣花溪上吟詩樓展修禊事聯清謳時光冉冉如傳郵故人
有約爲春畱城西仙宇曠且幽松篁夾道停鳴騶滿庭芍

藥佳種稠紅雲燦爛垂梢頭主人偶拘采薪憂羽士代之
共唱酬擊鉢聯句人皆優枯腸如我亦頻搜人生行樂須
自求偷閒暫欲伴沙鷗千杯痛飲銷千愁詩成再與訂重
遊

華陽諸生李某讀書東門外古寺寺多芭蕉僧闢地種菜
刪數本生止之一本未及除而已被刀傷夜靜一麗女入
生室稱謝詢其故自言明季隨父任入蜀年十七夭歿以
金玉玩好爲殉屍得不朽魂則依草附木昨附芭蕉爲僧
所傷幸君救止然已傷旋辭去一夜復至言傷已愈就案
頭翻閱詩云幼時父教以詩吟咏不倦生以詩再三索和

詩成甚悽惋後爲術者所見以法制服生急爲緩頰釋去
惜傳者忘其詩並忘其姓名咏以詩云髣髴隍中夢一回
羅衣化盡委蒼苔隨他綠葉重重裏無限芳心展不開蜀
道青天遠傲廬吟魂夜雨憶當初雖然未化鴛鴦瓦也似
芳蘭幾被鋤

有販香客寓巫山江岸夜有女來奔自言黃姓前居此宅
未嫁而歿今六十年矣與君有緣故來相就遂如伉儷事
久頗洩或自窗暗窺姿態婉媚美女子也入戶卽不見由
是紛紛詰問某厭之遷於夔戲爲作詩云夔府孤城寄客
蹤江皋解珮憶從容宵來雲雨歸何處回首巫山十二峯

巫山山下水蒼茫草沒荒臺笑楚王眞箇消魂非夢裏客
如韓壽也分香

張秀娥江南人父名士隨母依越舊照磨某娥年十四成
都王石友名玉坤讀書越舊廳署主人欲爲作伐石友以
未見其人婉辭女之母嘗轉借王書後石友於還書中得
女二詩深悔女已南歸矣芳草詩云青青水郭與山村踏
向清明欲斷魂芳草自多離別恨莫將情短怨王孫落花
詩云風風雨雨自堪嗟誰把金鈴護眾花本是鳳皇池上
種可憐零落遍天涯

桐廬汪桂山百祿爲三臺令題王西躔魚通蠻唱集云薰

風前度送吟鞍眼界都從閱歷寬絕徼睢盱尊活佛出奇
山水傲清官臥龍績爲籌邊著摩詰詩原當畫看自古弦
歌能化俗政聲早得百蠻歡

徐香蕉薇乙酉孝廉雲南嶠峨人署南部回積勞成疾不
久病歿著有奩豔十六詠皆古美人也詩已不記嘗題其
集云新詩細讀勝冬郎宛轉誰疑鐵石腸倒海明珠難抵
字生花彩筆欲流香每憐哀怨成千古似召嬋娟共一堂
多少癡情徵蕙業漫將遊戲視文章

吳雅笙號湘亭父任游擊勅教匪殉難世襲雲騎尉有勸
之入營者不應入成都學屢試未售以筆墨遊幕今甲辰

秋與春舫太守董榭園教授杜樹齋學博暨余友沈珏齋
登凌雲頂作七律云三江努力撼烏尤今古洪濤去不休
佛脚已隨塵海沒客心先聚水雲愁英雄淘盡空陳迹笠
屐重來且浪遊勞我心情獨惆悵我眉含黛畫新秋

西昌令書綸號碩農正藍旗壬午進士送客云蕭疎風柳
外落葉送行舟故國湘南水離情冀北秋帆隨歸雁遠目
極野雲浮已近黃花節相思一倚樓又咏秋蟲云依人如
有訴吐恨不成聲同人爲之擱筆

臧雒字中州山東諸城人謁選得長寧縣好臨晉帖道光
二十二年入黔買鉛有黔行雜咏紀風土質樸可喜其五

言云去國八千里重爲一月行蠻方詢土物旅邸驗人情
酒入貧家饌書間破屋聲殷勤來索字道是舊知名川源
流不到未免石田荒六月無修圃三秋少築場瓜垂當戶
竹豆上過牆桑葛屨歌唐俗此中咏履霜苗獮分丫髻此
方種類多耳環垂似月頂布結爲螺衣備尋春着笙隨跳
月歌襟裙分黑白工拙較如何男婦皆畱髻蠻方更不同
種分盤瓠外傳入竹王中梳壓螺堆黑花攢布簇紅歌聲
渾不辨難採是民風七律云塵囂欲避總無緣暫息嘉州
正暑天半畝芡荷香抱露數株楊柳碧含烟宦情久擬波
閒鷺生計還輸木末蟬蘿薜簪纓原一視何妨城市着神

仙途次嘉州同鄉邵蓮溪太守畱飲荷池作也

同年李恭甫珙彈琴嗜奕閒爲詩曾於棧道題七律於旅店彭星舫見而愛之對客誦其句輒有二古井云造輅筒酒於此修亭覆之未久歿於官兄珣號東璧以孝廉分發來川有詩一冊主鉅野書院喜弟恭甫至作詩云山城冷我對床吟此夕君來喜不禁百里已增兒女戀終宵難罄弟昆心探囊互剖新成稿設几重溫舊學琴一椀秋燈一天雨客中難得此光陰恭甫山東濟寧州人

蜀地江可濯錦溪亦沅花芙蓉名城海棠稱國靈奇秀異之氣鍾於文人閒毓美女麗若文君狡若武后妖若玉環

才若花蕊傳播古今其揚徽彤管者或未多見黃崇嘏入
所豔稱未知所終秦良玉以忠勇冠世獨標青史乃前此
有可與木蘭並著者勿謂古今人不相及也碧梧雜錄載
四川西充女子代父從征以功授都尉厯官數載而歸嫂
見其腰軀肥大疑而嘲之女置酒邀親里會飲刳腹以示
無他葬順慶鳳了山翁仲猶存名都尉塚至今猶呼爲都
尉娘娘墓又劉惟德韓娥傳略云元末韓娥四川鹽運副
使新澤之孫處士韓成之女年十二值寇亂叔母予以男
子衣後爲賊掠去自名韓關保展轉隨千戶羅甲娥事之
如父羅愛其勤謹爲納婦不敢辭百計避之他日以事至

成都尋見叔母叔母已不識娥指頭上刀痕仰天痛哭召
媼視之依然室女在軍中已十二年矣後配馬復宗生子
女二人可入傳奇表其節烈而未盛稱於世豈非愛古人
而薄今人乎都尉墓後或誤爲他人之墳韓娥當時作詩
咏之者甚多今未見乃俱綴以詩詞雖不工特以韻語紀
事錦江女兒如花艷女兒豪俠帶霜劍不信請看韓娥篇
英雄兒女一身占兒家生長本高門阿翁轉運沐皇恩無
端羣盜如蜂起兩川瀕洞風塵昏吁嗟弱齡椿萱失深閨
叔母憐慧質一旦骨肉痛分離玉貌含羞未敢出開箱攜
取男衣冠總角梳裝別樣看忍使明珠混魚目獨恐樵採

刈芳蘭牽衣泣別難
佇道旁觀者爲酸楚
漂萍泛梗各遁藏
海角天涯知何處
滿途戈甲馬如風
強裹良家入伍中
冒稱童子韓關保
指揮迫協負刀弓
殺人如草起腥穢
峻嶺深溪那敢退
月黑燈紅萬帳聯
孤身宛轉豺狼隊
誰氏妖嬌露花鈿
輕落虎口泣呼天
冰姿噴血死堪惜
花貌委身辱可憐
有緣幸遇王萬戶
拔出火坑得樂土
轉贈朋好羅軍官
從此奉事尊如父
袴褶從戎箭在腰
蹙眉肯將黛輕描
溷迹旌旗淚偷洒
迴頭鄉里魂暗銷
青年出走纔十二
荏冉韶光二十四
屢經戰陣血染袍
防身惟防意外事
不向東風怨落梅
女蘿強附遣良媒
釵裙並坐光輝映

雌雄兔走費疑猜。良宵怕進芙蓉帳。洞房相避。不相向。此
身恨不。變男兒。此時意氣。何由壯。忽報官家。又徵兵策馬。
隨軍到錦城。兒家門巷。何從認。花木斫。伐臺榭。傾徧向。塵
間詢父老。柴門斜啓。滿荒草。扶藜衰媼。步蹢躅。紅顏非昔
首。已皓。轉問客。來自何方。聞聲欲語。悲斷腸。老眼模糊。疑
武弁。那識兒身。是女郎。含情歷訴。更嗚咽。當日牽衣泣離
別。萬馬叢中。烈火飛鍊。得貞心。堅似鐵。一從別後。幾經春
關河迢遞。隔烟塵。多少芳容。埋黃土。未隨新鬼。化青燐。聞
說生還。自遠郡。頻呼小名。頻微暈。失喜花朵。光照人。蓮出
污泥。仔細問。手捫刀痕。淚潸潸。趙璧無瑕。竟得還。腰閒窮

袴針縫密臂上守宮血點斑火伴周防晝兼夜今時歡欣
當時怕明妃出塞終不歸文姬入關身再嫁脫却鐵衣換
羅裳窗前對鏡貼花黃完節共推奇女子鄰里爭看相扶
將洪武天子明堂坐大開金門受朝賀驚聞奇迹世間稀
賞賜崇隆萬口播吁嗟乎灼灼天桃女兒身萬人海中不
能侵雖非代父邊關去一曲木蘭千載心右韓娥篇都尉古塚
草蕭蕭林深月黑風怒號鬼火青紅耀涼宵火光閃爍隱
嬌嬌似聞鐵馬聲囂囂千載貞魂恨未消父老太息述前
朝有女代父馳征鏢萬里關河去迢迢旌旗獵獵風飄飄
女兒身健馬騰驍男子裝束弓在腰破敵擒寇稱雄鰲勅

封大官加錦貂屈指數年歲月拋困頓風塵芳顏彫年過
未肯賦桃夭深更風雨歎無聊眷念故鄉心忉忉欲完骨
肉歸蓬茅不着鐵衣拖紅綃重施丹粉插翠翹嫂氏旁看
螺黛描笑指碩腹騰譏嘲大開華筵備香醪左右親鄰徧
相邀再拜席前頰紅潮身在行閒隨征旄無人識破敢橫
挑冰心耿耿日月昭對眾解衣胸插刀熱血噴溢氣衝霄
四座驚歎蹙眉梢如斯節烈勁不撓辛勤代父著勲勞惜
未跨鳳偕吹簫橫被惡言似焚燒一朝霧散天次寥仰視
秋天明月高應有過客陳芳椒墳頭壘酒杯澆右都尉墓
侯梅橋爲雲南縣令補京秩加捐通判來川署敘州府筠

連縣病故嘗言有友任某過直隸青縣見旅館題壁墨迹
如新字極險勁詩云十載攻黃卷千鍾鍊碧銅詩書銷氣
節歲月老英雄偶着飛仙舄常乘破浪風鋤奸頭已斷論
賞劔無功穢事催秧馬春遊門草蟲太平無一事長嘯入
雲中自識云過某處見官弁與賊相持因放二丸斬賊首
三十餘官軍不知也故句中及之梅橋名大受善書因憶
十七年卸榮昌篆晉省宿茶店有題壁詩云濃陰綠樹日
初長布穀催耕喚夕陽憶昨初歸剛二月柳絲輕壓菜花
黃亦有風致不知何人作也

鄧通之銅山富人而乞丐也張桓侯之刃斗武人而文雅

也秦良王之白婢婦人而丈夫也亦可謂之三反作竹枝

詞咏之云明月樓頭且醉眠

在嘉定

從來富貴亦徒然鄧通

墳近銅山在寒食無人掛紙錢瞋目猳鬚氣概迥雄心祇
爲助炎劉文光半夜騰刁斗鐵畫鋸於丈八矛石砧蠻兵
世共聞桃花匹馬破千軍沙場不是奇男子巾幗如何肯
贈君

內江某名士也以副貢入闈三藝已畢未愜意復作旁有
少年問故以意告少年尙窘無一字乞之某爲點定數處
與焉揭曉某仍落孫山少年竟中攜金往贈某固却曰此
余所棄非賣文也乃禮爲師

四川高白雲太史名辰觀星象言山東有事明年有王倫之變破陽穀據臨清殺人如麻尸墮河隨水下一女尸仰掛閘口忽上流漂一男尸至躍起伏女身順流而下事亦奇矣王倫反謀已久穀熟不收豆作人面形屢示期興兵縣令漠然不問四川李漱芳上疏謂官逼民變蓋風聞不

實遂以妄言降部主事

太史金堂人

秦良玉咏之者多名作明思陵當日所賜絕句四首雖空寫後來竟不能出範圍蓋後人身處局外詳於事實以議論角勝思陵親當困阨且喜且歎言外唏噓欲絕此摹擬與真境之別也嘗見思陵賜督師楊嗣昌鹽梅暫借作干

城一詩親書長幅字大如碗勢雖飛動而乾筆枯燥憂瘁之色可掬

唐二羅名金鑑廣東人癸巳進士初號勉廬嘗遊羅浮從合掌通天兩岩閒行百十步于華首臺東見一洞上接水簾中列石屏左右流泉問僧云昔有羅漢居此乃刻羅漢洞三字于石因改號二羅又自號羅浮四百三十二峯雲遊道人諸境有詩並徵詩合刻一集闢羅漢洞云勝地有興廢顯晦難自藏我入羅漢洞誅茅事開荒洞中石削男離立如人強流水橫其前盥濯肌骨涼上有飛瀑垂來自千仞岡眾峯摩天碧巖巖雲蒼蒼懸崖樹交蔭羣鳥飛迴

翔下視石爲船坐憩殊徜徉時聞華首鐘日落歸寺忙好
景不可沒畱與僧同商登飛雲頂放歌昨夜夢中見雲雲
氣相鈎連而我落落莫莫愔愔如乘船一時散在千山萬
山上有人告我山卽羅浮巔羅浮之巔高莫高於飛雲頂
我今眺望恰如夢裡所見雲滃然於焉腳踏雲氣飄忽上
放歌以抵碧落之九天天風吹來助我生羽翼飄飄輕舉
如飛仙重雲繚繞穿腳底俯視下界九點烟奇峯四百三
十二一一羅列遊客前仙人跡信難到而此巔劣尤貴
足力堅冥濛險仄喜得僧我導芒鞋竹杖簞笠而遷延一
行一止一回顧置身無着但覺高且懸層厓大叫徙倚發

鸞嘯劃然眾山皆響萬慮捐人生到此亦快意仙都悔不
早着鞭須臾落日天宇黑紅輪滾滾沉虞淵三更又見羲
馭出海底光騰萬里隱約咸池邊大觀真得未曾有曠懷
歡拍洪厓肩下山盤曲向歸路天鷄喔喔斗喚人尙眠安
得仙人大蝴蝶倦遊歸去乘翩翩自題二羅石室名山生
面劃然開那管山靈占地猜此日行窩署安樂昔時浮海
割蓬萊身畱雲影水簾洞夢繞天香華首臺玉笈牙籤資
著述瑯嬛應得探書回

二羅前任遂寧
知縣現寓成都

白帝城東門忽陷得玉碗三枚大小相套最小一碗盛水
四圍皆有篆識之者云有章武年號知係昭烈時物時恩

太守得之甚寶重俄城中連被回祿乃悟此武侯鎮火物
仍照舊安置城樓乃息聞成都南門下掘得一盆中一大
火字四圍無數小火字中亦有水繼乃民舍官署屢被火
仍埋於南門下乃已疑亦武侯鎮火物也術亦神哉
蜀有薛濤井文君井薛濤井水製箋鮮艷文君井在臨邛
惟文君汲之則甘香沐浴則滑澤他人則否豈天生尤物
水亦爲之效靈乎咏薛濤井者甚多文君則咏其井者少
矣陸放翁曾遊作詩第大方家數不屑如後人描畫故詩
不盛傳余作絕句云當壚微倦晝長閒暫沐冰肌掠翠鬟
不待蛾眉臨鏡好還憑秋水寫春山汲罷銅瓶碧釐寒琴

臺日暮倚朱欄市人都醉壚閒酒誰識清泉淡愈甘

納溪縣河中石子生成人物紋理如繪居人多覓此求售
有秀才某暇時輒於其中檢視得西廂一部如待月聽琴
等每石具一劇纖毫畢備真奇物也

遂寧張文端公其生也封翁夢祥雲繞屋入秋闈監臨某
公夢綠衣人騎白馬進某號醒而異之記於簿試竣知爲
公名相傳聞中有神監察記者非一道光十七年四川丁
酉科適寓省垣僕人抱小孫肇元觀主考入院天尙早無
多人孫忽色變求歸問之云見門前有三入甚巨一赤面
執刀一白面甚文雅惟一黑面者極猙獰手執長桿不知

何物俱跳而入時方五歲也至今猶能言之文端公一代名臣所至動鬼神良非偶然居官廳事前塑關帝周將軍執刀侍立公設案對閱文卷有干請或耳語者輒指示曰不畏周將軍刀耶閤人受賄將入有所白見周將軍手內刀動懼而止公爲吏部尙書時有詩云謬忝銓衡愧此官白頭垂老息肩難思親惟有衰年淚獨寢無如旅夜寒髯爲憂民摧作雪心因補過鍊成丹天恩若許陳情去菽水承歡也自安其淡於名利可以想見矣

潘時鑣號軒三江津副貢體貌魁梧善談諧楷法最工諸父兄弟多以科第顯軒三未達少年牢騷多見於詩就州

判往滇爲伊制軍所賞補缺未匝月卽陞知縣詩集甚富
僅見行勝小草宿梅樹舖云客路亂山中山山落日紅一
肩投埜店小屋隱寒叢煮茗憐僮苦當鑪笑婦工明朝天
色好策馬匆匆秦中懷古云虎踞龍盤據上游秦中自
古帝王州杜句天心紀次占鵲首地肺封疆鎮鹿頭鄠杜鶯
花三月暮殺函風雨五陵秋就中崛起兼承統多少荒烟
說故邱七盤關云上有千仞岩勢欲壓人頂下有萬丈溪
清欲攝人影橫空仄路通延緣曲如蚓自下而上上高難
爲引頸自上而下下深疑入智井惟第七盤雄曲折轉危
嶺小心移步閒旁碑有小心移步四字眼花亂炯炯蜀門自此通秦

關自此整笑語問金牛何獨闢斯境古來幾戰爭都爲賢
者并矯首望觚稜五雲生耿耿五丁力士開山處放歌云
醜石亂堆盤古骨綿亘連天障秦蜀蒼靈欲使版圖通鬼
斧神斤闢山麓開闢以前未可知四萬八千歲誰稽石牛
糞金徒詭詞況是美女秦人遺化蛇入山力攫之遂乃劃
然雷奔電掣開崎嶇我想自有東西南北路曠窅難窘章
亥步二億三萬三千五百里計程足無有所不到處蜀山
與開明史牒書其名或者前尙介然用峭削不慣行人行
五丁力士奮然怒特爲鑿剗路不平後人思爲好貨好色
戒故神其說令人驚噫吁嘻險奇自古悲蜀道青天難上

人驚倒抑知險奇亦尙有人行惟有人心之危想不到波濤涉忠信叱馭談忠孝大踏步來如坦夷摩天一路衝飛鳥

青神三教院昔有士人訓徒於院旁有樹鶴巢之士人出徒取鶴卵煮熟甫食其一師歸懼以餘還之巢久之鶴卵出雛徒驚異傳說師聞視巢有草一莖兩岐凡病疾死亡枕之卽起人爭迎之日不暇給乃師徒岐分遂不復驗余子俊八景詩云三教院中生瑞草卽此

榮邑張藻庭名紹華讀書幾於過目成誦補弟子員家貧舌耕耽於詩每爲宗匠所許可學使聶蓉峯先生給以膏

火命從學於奚雨谷先生之門成都湯某聞其名以女妻
之年二十餘竟卒無嗣詩稿多散失團扇云拋向西風又
一年相逢猶認墨痕鮮莫言紅袖無消息却與青衫有夙
緣顧影多隨明月夜迴涼好趁火雲天放翁畫去休嫌瘦
記得前身骨是仙鶴夢云人閒清福恰平分野鶴飄飄夢
識君遠浦歸來千里月寒山睡起一天雲誰家欹枕遊仙
幻何處疎鐘古寺聞知有乘風佳兆在來朝飛去定空羣
秋柳云閱盡繁華眼界空爲誰飄泊小橋東可憐極浦寒
煙外都付荒城落照中十里殘陽三里霧一江疎雨半江
風湖邊裊裊知多少看到秋深自不同長堤遠水暮雲天

惆悵關山思渺然古道西風寒繫馬疎林斜日晚鳴蟬人
閒秋夢驚春夢江上今年老去年羌笛數聲何處聽一簾
殘月照樓前亭長亭短客魂銷嬾對千條與萬條爭耐馬
嘶黃葉渡不堪人到赤欄橋一年春景絲難繫三月風光
絮易飄回首劇憐沽酒地碧帘深巷雨瀟瀟無限秋光付
杳冥樹猶如此太飄零天涯惱我頭應白客路逢君眼尙
青睂黛風流曾入畫腰肢消瘦不忘形來春灞岸花開早
滿地濃陰覆翠亭

榮昌有羅某家有石白色形凹置餘飯飼犬久之飯不減
羅出見之謂妻不宜棄飯妻暗伺之見犬食已微有餘粒

明日旋滿乃移諸室置一錢隔宿已滿告其夫某某遂修大橋數處不置產業久之隣人微聞某有異寶問之終不言既老謂家人曰吾沒後汝恃此物必習淫賭終不爲福乃棄石於河夜夢神謂之曰汝甚有識今與汝一物濟人危急不知何術凡有貧病危難輒予以錢不能多也邑令李光謙以修橋功上其事大憲奏 聞褒獎立坊曰好善樂施某修橋不立碑鄉人稱爲羅善人年享耄耋無疾而終

董櫟園承熙嘉慶甲戌進士與壻庶子李五子惺同榜紀曉嵐先生門下士也居京師不時進謁晏坐小齋淪茗進

香皆雙鬟奔趨左右不待彭宣到後堂矣初爲江西青田
令調餘姚歸爲嘉定府教授年高而精神矍鑠喜談詩生
曰自壽云穹窿無停機誰能測終始人生寄大化奄忽颺
塵似萬物分相牽勞形竭精髓原非金石軀那禁鑠且砥
所以古達人吉祥安止止憶余來漢嘉泊然中不滓馬齒
日頻增十有三年矣閒散鳩藏拙爲貧聊復爾三義遠相
招九峯欣在邇烟霞盪素心丹邱差可擬晚菊餘秋英早
梅肇春蘓生機運不息默坐叅物理柵園忠州人子亦辛
巳孝廉

蓬州洪芟塘運開安徽合肥人壬戌進士才氣豪邁足跡

徧天下官蜀三十餘年今歲甲辰歿年過古稀矣初以詩文滋物議赴裏塘管糧務坐藏大臣碩農先生其師也回京路過以巴音集請序碩農略緇閱斥之曰爾前以文字獲戾今所作又如是是可焚也自後多不存稿其摺撫所得曰劫灰集五十自壽云疏慵只合避時髦官職詩名兩不高蜚市已知塵網幻愁城猶待酒兵鏖漸償婚嫁前生債未報親知客館袍明鏡不窺吾尙少免教華髮逗蕭騷巴賓道路幾曾經屢踐蠻夷大長庭客裏韶光眞逝水宦途老友亦晨星差無鬼瞰絲安命頗望天憐倍錫齡欲撫朱絃寄情緒滿懷沾憊不堪聽小州如斗帶清江官閣紅

梅鬧綺窗馬齒頻增終不偶豚兒學語幸成雙難摩趙步
慚鄰女拚作巴人只舊腔報道花年過大衍笙歌濃處夜
鐘撞鷓鴣容易託長林坎壈何緣困此心日者尙言讎未
退時乎偏覺老相侵乾坤事業輪豪傑泡影榮枯歷淺深
遠道息肩徒有願曉來無語對朝簪

鄭藹人之彪山西孝廉援例以州牧分發來川爲人書便
面咏春柳四首其自作也不復記所持扇題詩弔史閣部
云天子願爲陳叔寶將軍誰是霍票姚孤臣血淚留遺翰
半壁江山湧暮潮燕子卽今迷舊壘梅花終古弔南朝小
東門外傷心地欲爲忠魂賦大招予謂詩固佳矣但以福

王之愚頑不堪與叔寶捧硯安能學之作者爲翰院賈君
名臻北直人是時年方二十餘耳詩不多作畏其難也非
率爾操筆可知鄭子卿爲謫人兄在陝西署褒縣名映南
者宰吾邑忘其號爲謫人姪同援例出仕謫人以細故降
調捐復發往廣東聞又掛誤宦途之蹭蹬如此

山左史梅裳有登望江樓詩詩云萬樹爭夔閣千山急劒
州我來八月節忽結百年憂地逼巴渝盡天包楚鄧流何
堪復吹笛風雨迸深秋梅裳濟寧州拔貢今就縣令山左
詩乾隆閒推高密三李第取徑郊島梅裳後起力追少陵
五律浩浩落落蒼渾健舉有萬夫莫當之概此詩足見一

斑或云樓去夔六七里閱通志無之味詩意似于夔爲切而梅裳未悉其會入川否也

毛梧生輝鳳以大挑來川補綦江令善書工詩自荆溯峽有句云地愁山占盡石與水爭多確肖蜀中情景爲吏循循所至有聲署巴縣卒於任人咸惜之彭星舫有詩哭之云因緣香火了今生回首靈山涕淚橫同譜楷模資我法他鄉骨肉見君情當官陶令心原淡易俗文翁化已成不分巴江丹旄映淒涼如此作歸程與星舫同年交好故言之真摯如此子震壽援例指捐四川知縣

毛丹雲含昱溫江人性灑脫與人無町畦借人衣長不適

體卽裁使短人驚問曰與體不稱不裁何爲興至欲遊賃
與卽行途中乏用指所衣裘曰無須此矣卽脫去質錢人
其愛其豪爽爭客之絲竹六博所至爲家胸無一事談次
偶倦就枕卽睡不知誰爲賓主從不寄人書人寄書或不
拆視曰世故語令人不耐其率易如此健於爲文落筆卽
工少時周遊賣文爲活得銀隨手付歌兒酒保遲久歸里
空空如也不敢入家門借貸入闈領鄉薦旋成進士爲部
曹次當補缺矣措資外出友朋資助數逾萬金沿途徵歌
選舞多買美姬樂而忘返江行舟覆遇救幸免僅存二妾
裝橐盡付波臣笑曰吾身在無慮也回京資格反後後者

居前多選用朋好咎之略不爲意開捐之歲得印結銀頗多輒問曰此物堆積殊累人一夜揮盡乃已現爲潁州知府有見之者容顏未衰胸無思慮故也有憫其無嗣者曰有子累方長正喜無羈絆曠達如晉人狂而不肆所謂本色人難學也未嘗學詩酒閒聯句出語輒佳天資不可及矣

紀大奎江西臨川人精數學以孝廉爲博平令丁艱歸嘉慶十一年赴都候選時有二缺廣東者豐貴州者瘠有人餌以多金當得廣缺紀不爲動私謂所親曰食祿有方吾當爲四川什邡令二缺非吾有也時紀頂選而什邡未出

缺咸以爲妄旣而選貴州人多咎其惜費之故將引見
山東咨文到部以前任博平公項未清例停選及項清而
什方缺適出紀得其缺術亦神矣

謝彤雲鑒中江人道光丙申卒有中年婦攜一瞽者以隻
鷄斗酒來弔哭泣甚哀詢之云楊姓昔年貧將嫁妻得錢
八串慟泣於路不忍別鑒遇之如數代給得完後貲盡仍
將嫁妻鑒聞之倍予以金使佃產爲生計今聞其卒特來
哭奠語畢益嗚咽孝廉黃中吉作歌以紀之生不如人瞽
兩目貧至嫁妻向誰哭亦知妻去夫益孤自分早晚填溝
瀆忽遇謝君給以錢夫婦幾如再世緣金錢入手容易散

一再投贈心慨然驚聞薤露哲人萎再拜稽首告重泉追
念流離蒙嘉惠鴛鴦重聚鏡重圓卽今餘喘相扶持更有
何人爲周旋悵悵啼泣奠杯酒惟願先生昌厥後孤兒他
日表隴阡晤子重當來稽首

大寧仙人洞在城西北距鳳山三十里石磴崎嶇循溪直
上山腰有洞下視百千螺髻羅列于前進內愈行愈廓清
泉絡繹石多怪奇大者如楹長者如柱高者如棟環者如
幕厯代遊客多有題字有人裹七日糧秉火窮探未得所
止明狀元羅洪先遨遊住此後不知所終洪負盛名有高
世之志題詩洞壁墨迹淋漓有云海門萬丈浪如山一轉

千年咫尺閒洞中聞雷催雨急作龍爭似作魚聞中有丹
爐傳仙人王子嘗鍊丹於此天下如此境者亦復不少無
人能擺脫塵網如羅先生耳紀此以當臥遊

人鮓甕鬼門關黃山谷由夔巫入蜀詩用之忠州去夔不
遠亦有所謂鬼門關者陸路非水程有陳氏嫁瞿某歸寧
時攜一雄鷄過鬼門關遇宋木匠強欲污之不從死斧下
州牧相驗忽聞層崖亂石閒有鷄鳴若呼宋木匠者一訊
伏罪咏之云貞心如玉節如山白刃心甘低翠鬟月黑深
林啼杜宇至今人怯鬼門關黯黯青山日沒西荒途夜冷
影淒迷郎今枕畔聞鷄唱都似幽魂宛轉啼

張熙宇原名希翊號玉田義眉人道光癸巳進士廣東番禺知縣現以軍功陞知府少年時有花景詩四首一時傳誦杏花雨云雨聲一夜小樓東碎錦霏霏著樹紅深巷乍驚香閣夢前村猶趲酒旗風香痕隱約餞簫外畫意微茫燕剪中記否行人魂欲斷清明天氣遠濛濛柳花風云朝來檢點護花鈴誰綰情絲萬縷青姿態可憐真草草飛揚何處惜星星一春江上還河上落日長亭更短亭聽到啼鶯倍惆悵赤闌流水已浮萍桃花水云才向東風沆麴塵韡紋新漲碧粼粼鱖魚猶憶江南路畫楫還迎渡口人暖浪晴添三月雨殘紅寒剩一分春憑誰寄語仙源客莫誤

漁郎錯問津梨花月云捲簾長日愛香熏院落溶溶月二分若有人兮春帶雨斷無愁處夢如雲城邊柳絮東闌近笛裡梅花子夜聞便擬青旗沽酒去明朝殘雪恐紛紛周石芳學使云風調在中晚之間

舒元興記古桃源圖人物皆有仙意自唐時已爲古畫其來久矣後世其圖益多吾東冷枚以人物著名畫桃源圖十二幅山水人物着色生動惜無題之者聶蓉峯視學川中以此題試士多佳作蓬溪李祥慶云巍然壁上一幅畫圖張上有超然隔俗之仙鄉懸崖積翠鮮欲滴大江春色流蒼茫有客到此忽昂首萬壑飛流生戶牖始知仙境在

人世尺幅之間羅萬有先生豈獨老畫師上觀秦漢如同
時武陵漁人遊覽處收攝胸次森神奇興來寫出軟塵表
一洞紅霞春夢曉垂髻黃髮競迎客雞犬桑麻紛繚繞山
雲變滅天陰晴四壁如有問津聲我來彷彿遊仙源習習
兩袖天風生青鞋布襪綠玉杖仙乎仙乎恣遊賞翻身幻
入列仙宮魂魄應在畫圖上先生六法真英豪對此蒼茫
首重搔詩仙畫手不可作水波浩浩蒼天高又中江唐培
元云溪山無數溪雲起溪上人家溪外水小艇初停洞壑
幽桃源乃在畫圖裏桃源春至色如許春林占盡藏春陽
冷澹胭脂紅欲然霧雨霏霏無定所年年春色三月新拖

藍一帶波鄰鄰晚來紅雨迷深岸初日頽霞照比隣東村
西舍何所有垂髫之童黃髮叟自言本是避秦人耕耘不
覺歷年从漁郎到此復思歸扁舟又趁鱖魚肥洞門忽鎖
回頭望惟見沙隄鷗鷺飛我今猶欲問姓字但恐隱者亦
遐棄捫圖聊結世外情臥遊亦別有天地

張照南新繁諸生嘗擬東坡梅花詩云空山流水影橫斜
處士園林三兩花昨夜冷香清入夢感君詩思寄天涯逐
日清吟聳瘦肩跨驢尋遍雪中天前村知有臨溪店祇問
香醪莫問錢傲骨支貧戶欲扁得君相對眼猶青齋頭松
竹須良友却向鄰翁借膽瓶宜疏宜密復宜遙惆悵無端

傍野橋曾見仙人吹鐵笛江城幾度暗魂銷

無錫女史丁采芝號芝潤丁耦仙刺史女張船山太守甥
也隨夫鄒雨香官四川爲永寧赤水縣丞錄其懷人詩取
其相因而及諸女史可並見焉孫蔭伯夫人論交閨閣幾
心知豪俠如君更數誰讀我新詩憐我女閨中風教仗扶

持

夫人喜讀子詩孟嫺
于歸後視如猶女

芝露大姊一繩秋雁帶商聲驚醒

懷人夢未成天外尺書消息遠粵雲嶺樹不勝情纖雲三

妹西湖風月只供愁偶蹈歡場淚暗流縱解閒吟消去日

莫教詩句易成秋

妹自遭子湘之變鬱鬱寡
歡近喜吟咏以消歲月

葉畹蘭長嫂

昔年萬里數歸舟代檢琴書共倚樓記得妝臺低拜月兩

人攜手看牽牛念薌弟繼配秦孺人芙蓉湖畔柳青青同

飲離筵酒未醒一樣從夫行萬里輪君侍奉日趨庭時秦太夫

人同住平涼縣署孟嫻長女苦恨連年別緒生竟思乘輿向南行

盈盈一帶西江水攜汝同來慰此情時孟嫻隨任西江徐擬以舟邀來蜀

端甫夫人君歸喜我屢經過一見其如永別何今日零星

衣袖上酒痕那抵淚痕多二弟婦華孺人爾我同心兩不

疑蘭山重聚話襟期而今追憶渾如夢忍讀微之痛悼詞

念薌弟有悼亡詩廿首辰原四妹絕妙金閨咏絮才前生仙籍隸蓬

萊修文天上應如願珍重人閒玉鏡臺妹曾託夢言已授修文使者之職

文嫻姪女生來仙骨太伶嫻吟得新詩筆不停一陣孟婆

風信惡可憐空繫護花鈴雙修菴女道士韻香膽瓶梅亞

小銀缸瘦影橫斜漾畫窗不見空山人聽雨傷心楓落冷

吳江

韻香既屬填空山聽雨圖詞復又自寫吳江楓影小照索予題未竟卽聞辭世朱小髯夫人

一載盤桓兩意投西窗剪燭話綢繆不知今夜臨卽月可

否離人亦倚樓

時夫人隨任邛州

沈清如九妹琴韻十妹檢點香

箋幾幅詞令人重起舊相思東風不解離人意芍藥花開

三兩枝張映三夫人相逢萍水快傳柑玉屑紛披最健談

送盡故園多少客念卿更勝念江南

大學士一等公孫補山士毅乾隆辛巳進士戊子典試四

川安南之役已獲勝破敵而營中炊飯飼馬皆蠻人爲阮

氏耳目內外勾通刻期舉事我軍猝出不意自相蹂踐多
墜於江吾鄉李公化龍以總鎮從軍亦溺斃焉公欲以死
殉爲人救止又來川駐打箭爐辦理糧餉平廓爾喀黔楚
苗亂延及秀山公又移營堵禦其勤勞於川爲最著平生
折節下士李雨村載其南征詩四首甚雄偉讀之如建大
將旗鼓風雲變色

仁壽謝辛姑如芹女也如芹年適乏嗣辛姑幼已許字富
室鍾某旣笄告父母曰男若女皆子也今二人年已耄而
女終鮮兄弟請輟鍾氏盟女願終處閨閣以待親膳父不
可辛姑持益堅朝夕奉食疾病侍藥餌一切劬勞事皆身

代如芹卒鍾某臨唁辛姑爲喪主鍾氏訃期以死拒之繼
佐母餒十餘載逮歿殯葬如禮擇族之良者爲治母喪爲
弟擇師厚其禮敬親族貧者曲爲周卹卒時年垂八十倪
二姑幼字周氏子未婚壻死父欲別許人二姑不從願終
身事親強之以死矢親沒終日事女紅卒年七十餘與謝
辛姑不同而同咏之云男女居室獨無情蘭芬蕙馥金石
貞居家克全烏鳥愛守志竟成孤鸞名古有北宮嬰兒子
篤孝從來白天生白雲親舍望中迷若箇去國事遠征菽
水不供期祿養墓前五鼎何足榮二女婉孌侍膝下得博
親歡無他營生男勿喜或乖離生女莫惱能娛情兒女生

來重婚嫁婚嫁畢後萬緒縈人生百年須臾耳愛日何不
頃刻爭卓哉女子成孤往多少丈夫愧冠纓吁嗟乎多少
丈夫愧冠纓

應均南川廩生號鶴尹作詩甚多談笑風生四座傾靡一
日爲諸童命詩題云稚子總能文寫畢手僵中風不起歿
後生子家貧鬻書畫以食子極聰穎今年九歲經書讀畢
矣稚子能文或者預爲之兆耶四十初度自述云忽忽韶
光一瞥過半生無濟柰窮何商瞿占易門衰久賈島工吟
命蹇多壯志每爲時齟齬豪情都被酒消磨今朝不用提
壺勸手拍雲牙自唱歌題名从署信天緣也似東坡說可

憐忼慨生成心血熱飢寒鍊得骨頭堅屢招時忌難防口
苦被人嫌不積錢見惡可知年厯久算來何止是今年九
踏槐黃念已癡祇今贏得髭毛絲英雄原不論時命弃置
安能怨主司四海豈無知已在寸心嘗恨報恩遲勞勞人
事何堪問費盡栽培負我師此後優游化日長昇平歲月
足常羊讀書寫字清閒福種竹栽花行樂方難把苦心培
棣萼惟多笑語報萱堂斑衣權當宮袍看戲對東風舞幾
場

王石亭安宇榮縣諸生性沈靜好爲詩咏簾云一桁空明
未掩扉深深院落隔晴暉紅垂衫袖人斜倚碧透湘波燕

誤飛山雨欲來風淡蕩庭花半映月依稀焚香靜對紋千
縷還向閒中悟化機送蕭春林回湖南和畱別原韻高垂
青眼獨殷勤底事今朝手竟分十載崎嶇離蜀道一天風
雨望湘君吟成郢曲真難和聽到驪歌詎忍聞此後欲忘
忘不得挑燈把酒且論文

瀘州何椿齡雨厓飛鳳之孫也雨厓刻有詩古文集素耽
酒四十後學書遂戒飲終以書名二子俱名士椿齡有雋
才喜爲詩試古學必第一讀書錦江書院制府蔣礪堂先
生深器之不幸早卒詩未傳

或云金堂亦有何椿齡者杜宋梅生登高原韻高望山前

足高望烏尤對峙大江濱地當唐宋以來勝天與風光無
數新佳日竟能酬我輩辦香那得祝他人歸途一桁青旗
引小隊吟肩步後塵

道光五年九月初十日忠州鳴玉溪太極圖石蟻聚不可
數計中有大蟻其行如風羣蟻逐隊成行隨之或篆如城
郭或篆如宮殿或類人行或似花樣千變萬化不一而足
而大蟻則直居其中羣蟻拱輔之

劉國材一名學津中江增生負才略嘉慶五年正月教匪
渡嘉陵江國材募鄉勇三百請於綿州刺史劉印銓就涪
江堵禦刺史重其膽識推誠共事夜有難民渡河眾疑爲

賊欲破其舟急止之全活甚眾及賊渡潼河四月初五日
至縣境是日國材練鄉勇於黃鹿鎮幾四千人賊不敢前
遂爲德叅贊追及悉伏誅川北始靖庚辰 仁宗睿皇帝
上賓材於家塾苦塊十旬每日向北慟哭或問之答曰吾
雖未服官然世沐 國恩教匪之亂非 皇威耆定何以
有今日語次涕泣交下當時結團抗賊殺身不悔及立功
自効者甚眾獨念切君恩感泣盡禮如國材者不多見也
孫正慧道光乙酉舉人任成都教諭不突狼奔太縱橫風
聲鶴唳亦心驚三千子弟兵誰練一箇書生當鐵城兩川
戡亂鞏 皇圖塞北 巡方協舜謨獨重草茅明大義感

恩含淚望蒼梧

朱仁齋格甫安徽涇縣人嘉慶十九年守嘉州時值學使
按臨各屬學博俱集郡城年皆逾六十彷彿耆英會以唱和
詩刻石亦盛舉也仁齋首唱有云盍簪俱是人中傑倒屣
爭迎陸地仙駘背行來剛十二雁行排去恰千年教授文
楠年七十云巢睫螟空延歲月蠹書蟲豈盡神仙樂山司
訓劉銘簞年六十有六云白鹿清風身是佛青蓮雅咏句
如仙洪雅教諭喻齡懋六十九歲云當時叔度原超俗此
日文翁合號仙訓導楊喬湄年七十五云隨車甘雨身原
佛載酒凌雲宦亦仙威遠司訓賈淵第六十八句云夜雨

挑燈欣結社春風拂座快登仙外有榮縣教諭李醇信年六十五健爲教諭蔡汝瑤七十四訓導熊敬修年七十八夾江教諭李中英年六十六訓導劉盈科年最少

在山東見船山字皆真筆來川所見多僞作楊雲卿得船山詩草一冊字句多有更定裝璜以爲珍玩船山得梁山舟先生代江南紳士謝恩科表草裱成冊加跋語歿後歸其弟旗山武弁某以銀六兩取去可惜也船山與兄玄白武連驛阻雨作武連阻雨圖亦歸其弟旗山不知猶在否予家去阮亭先生不百里外王父臨溪先生藏池北偶談草兩巨冊塗乙滿紙後來視之似平平叙去不知煞費

經營乃臻安貼阮亭有天女散花小照頭裹幅巾跌坐蒲團上有天女半出雲中國初諸老題詩滿焉其後人攜以求售不知所終其手批錢宗伯詩卷西樵然脂集數十卷藏王愚泉允灌處愚泉辛丑以中書分校禮闈病歿所藏亦不可問矣阮亭與船山皆不再傳而凌替名者造物之所忌信夫

尹文端公繼善四蒞江南一督四川勲業表著而愛才好士吾鄉盧雅雨高南阜兩先生官江南皆爲所知在川未有聞焉蓋爲時不久也公好詩與袁簡齋唱和最多家學漸染諸公子皆以詩聞簡齋與慶樹齋相得尤深嘗見其

手寫數詩寄樹齋於京師者裝成一冊字大於指不衫不履自然名士風流視規撫儲虞歐柳多一重習氣矣文端公詩世多有不具錄

新繁費滋蘅錫璜曾咏大鐵刀有云萬人血洗都山鐵千年斑化辰州汞風雨時聞鬼泣聲精靈猶抱荆襄痛自註萬人關侯所鑄刀名未詳刀在何處涿州古范陽地張桓侯故里在城西十里有廟山門前有鐵鑄蛇矛不知爲當年故物否寰宇記云墓在四川閬州廳事東二十步學使吳白華題詩有句云兒童知俎豆寇盜避鞭彈則侯不獨善矛兼用鞭用彈矣嘉慶間桂軍門涵得侯所用鐵鞭重

五十斤長六尺送懸墓前爲之記焉惜未知其詳乃爲詩
以紀黑雲壓營旗欲折瞋目大呼膽氣決丈八蛇矛左右
盤以短濟長更奇絕手掣虎尾舞如風五十斤重六尺鐵
匹馬入陣萬人摧模糊盡是敵人血漢家王氣終火井焰
不紅有刀不斫嚴顏頭有劒未刺曹瞞胸但恨鑄錯不繼
壯繆後荆襄倚角成大功我朝有虎將崛起忠且壯當年
滅寇定兩川鐵槍一桿無與撓遺器傳畱忽入手緬想英
風神愈旺魑魅白日俱遁藏壯士袖手敢相傍敬奉靈祠
慰忠魂一物千秋大義存抉破疑塚七十二鞭尸三百看
血痕月黑半夜作雷吼將星垂芒天地昏

趙子龍盔懸某縣廟中明季流寇之亂失去今別鑄鐵盔
實非其舊也丈夫功名在鏖兜蕩滅羣寇匡九州偉哉子
龍通身膽長坂一戰功誰侔力爭漢中扶危運曾却曹瞞
萬貔貅脫胄露面人爭看飛將骨相宜封侯仲達巾幗何
足道魏王九錫亦沐猴豹死畱皮龍脫甲一物流傳足干
秋明季寇亂如鼎沸竟墮刼灰杳難求後來重造如贗鼎
凡鐵無復光氣畱吁嗟當時無虎將夔門失險神鬼愁誰
擊諸葛鼓誰執翼德矛虎頭燕頤戴鐵盔誓不滅賊心不
休胡爲乎棄甲如山爲纍囚

綏靖屯南甲泊汎三四里許有沙地極平坦兩旁林木陰

翳其左高巖壁立千尺古樹數株蟠曲如偃蓋有石穹然如覆盂倒懸欲墜嵌空玲瓏作鳥獸鬼物狀飛者走者僂而睡跂而立者無不畢肖復有石乳下垂如筍如鵝翎管者不可勝計皆涔涔滴水識者謂卽鍾乳云上又一洞廣數弓高亦稱是無隙漏光而明辨毫髮四壁潤溼多苔蘚剔之有石管如蜂房中空微吐水珠由洞口上數十級爲平坡橫出半壁仰窺石崖如削成梟枝絡蔓在半空中下望練江雲棧近列目前眞異境也

涪州陳漢槎炳壬辰孝廉前以拔貢入都朝考失意作秋草詩寓感多和之者巴縣部郎張春荃埵戢而刻之佳不

勝錄擇其警句漢槎云平原野燒空人迹古冢寒烟瘦鬼
魂春荃云螢火照殘荒塞外馬蹄踏徧夕陽中癸卯孝廉
龔瑞君鉉云蟲吟青冢邊關月馬踏黃沙古戍風江津潘
茂才燮丞森鏐云野渡白連蘆影外鬼磷紅閃月明中合
州秀才禹虹江湛云覓句空餘騷客夢尋香難返美人魂
巴州廖春颿先達云已是江郎傷別後最憐謝傳出山年
巴縣張春平坦云玉關行路憐今日金勒嘶風話昔年甲
辰孝廉張循亭顯理云白酒黃花澆客夢碧雲紅葉艷詩
魂

達縣李研齋名長祥明翰林也明亡奔南京授御史浙東

監國授僉都御史屢起兵恢復舟山破亡命江淮被執大吏不忍殺安置江寧時有閨秀號鍾山秀才者工書善寫墨竹容色絕世乃娶之朝夕甚暱大府曰李公有所戀矣守者怠忽逸去天下大定乃歸與吾鄉王西樵先生酒間道其事西樵爲作鍾山秀才歌云嬋媛有女鍾山居明珠不結紅羅襦獨向閨房弄筆墨墨痕時壓脣邊朱因有鍾山秀才號甄家博士差同調金釵每劃月窗痕錦綳愛寫風林貌水晶小印珊瑚紅字摹章草書名工夔門太史得一見不知乃出裙笄中太史時亦金陵住英雄苦有猜嫌慮浮沈聊試覓紅顏那知卻與傾城遇傾城相遇忽相憐

誰能遠結來生緣不成便辟畱侯穀好與共泛鷗夷船貯
將絕代金堂裏難忘結習芙蓉紙夫君乍見驚且疑胡與
鍾山秀才似一笑知是當時人當時見影今會真文園病
令詎辭渴關圖小妹誠殊倫書成朱鳥曾盈筭余有朱鳥逸史一書
備記聞秀爲君作歌重紀事許寫湘蘅報苦吟須署鍾山
之能文者
秀才字研齋爲翰林僅一年而志不忘國屢脫才智過人

研齋奇男子侍婢文鸞奇女子也研齋被難妻黃夫人集
家人謀共死文鸞已嫁有子進曰夫人當偕公子逃畱李
氏一脉婢代夫人婢女代公子夫人不肯文鸞促之甫出
家門而捕者至見大府儼以命婦自居侃侃不屈徙遼陽

或云有憫其忠義者以他囚婦代之行覆巢無完卵燎原
禍可慮忠義萃一門俄頃煎百慮丈夫報國甘就烹夫人
拚死女中英更有文鸞奇女子吐詞慷慨明且清闔門盡
節不受挫可憐李氏無一箇彩鳳挾雛請速飛罪重如山
妾當坐後門夫人出前門捕者來引頸就縲綫兵卒不疑
猜婢作夫人非兒戲公堂侃侃明大義滿庭官吏驚咋舌
何忍答辱但垂淚囚者坦懷奔者忙閒關義士相扶將謂
詰風吹海立蛟龍舞扁舟一葉出汪洋錢塘骨肉重聚首
夫得見妻子隨母痛說桃肯代李偃太史珠淚傾盈斗翻
城背主有多人不惜名節但愛身誰如紀信能誑漢惟愁

趙璧輕投秦消息難達書一紙入網安知生與死婉婉弱
女智勇兼人臣捐軀應爾爾滄桑家世痛流離皓齒紅顏
又一時謂娶鍾山秀才南國花月英雄淚北塞風沙兒女悲當年
精衛志填海百折九死終不悔感激忠烈摧心肝仗義還
憑巾幗在吁嗟乎男報主婦抗節婢子酬恩更奇絕蜀國
哀絃不忍聽蜀山杜宇空啼血山可移江可竭千載芳名
應不滅

風蘭葉寬花肥瓣有紅點懸之風中自能開花空中有色
更爲奇撲鼻幽香細細吹却笑石家諸姊妹翻將披拂怨
風姨蘭有兩花共蒂者謂之並蒂蘭湘皋九畹怨何深搔

首蒼穹迹已沉莫道孤芳無共賞而今也自結同心曾聞
燕姑瑞徵蘭含笑深閨仔細看合與荔支同作譜佳名應
賜並頭歡

四川荔支一顆兩核者
最佳名並頭歡今無聞

鍾笠舫从在制府幕後館敘州前攝篆興文相見甚歡聞
其少時讀書嘗遇狐女情好甚篤女能前知戒勿就刑幕
後功名未遂同鄉在蜀多以此爲業因學習焉出館卽有
聲望素喜扶乩一鬼判常至因結爲友以詩唱和判復引
一鬼至拜門生以乩語酬應與人世無異鬼判語笠舫云
從此館運最盛逐年推之無不應者遂忘狐女之言狐女
已从去矣人之一生托業亦有前定况富貴可妄求乎今

其子小舫猶在臬幕

裏塘之間官至煮鷄不爛問夷人云飲鷄以酒不過一杯
煮而食之與內地無異名曰醉鷄自願全生處不才長鳴
籬畔且徘徊誰知鼎鑊無由避貪醉人閒酒一杯

西川賈萬策明荊州督師中軍娶沈氏雲英道州遊擊致
緒女也緒禦賊歿於陣時英隨父任聞之奮臂持矛號哭
赴賊眾刃環刺女左右支格單騎所到萬人披靡卒奪父
屍完守入保事聞援遊擊將軍代父職領兵守城旣而萬
策殉節荊州女慟哭辭職開闢數千里扶夫櫬及父柩歸
葬蕭山國變後棄服飾隱居里門爲女教授素工書旁涉

經史然非本宗子弟不教也卒年三十八時在康熙閒也
毛西河爲立傳明世除秦良玉及別土司無以女居官者
惟雲英一人蛇矛入陣萬人呼女子居然勝丈夫爲報父
仇安惜死歸來卸甲血模糊滄桑一變事難論卸却鉛華
疊繡裙教授里中如博士當年躍馬號將軍

溫江秀才楊更生初名新偶病疫魂離舍沿溪而行列栢
成林偶撼一樹隨手而倒忽至一處菊花盛開流水繞畦
徘徊顧戀腹微饑憶楚騷餐秋菊之落英句試採食之掬
水而飲一老人見之曰服此可以長年且送之歸旣醒病
若失不食不語已十餘日矣俄傳言溪邊栢樹一株無風

自倒乃以夢境告人由是改名甦字更生道光甲辰浙江
蔡侍御磨洲先生視學來川考試成都異其名問故命其
以字爲名別字之曰菊年

鍵爲有張汝杰者廣東人家貧隻身來川負擔營生積有
微貲燒竈攻井漸至八十萬金迎父母兄弟共居產業甚
豐久之與兄弟剖分兄弟以其獨力辛苦所置外畱一分
收租二百八十餘石者讓之不受固強之則曰吾觀四川
去京甚遠舉子會試寒士最難願畱此田每歲所入分與
嘉定府屬登鄉舉者路費可也且具呈於官存案時宋梅
生爲太守深嘉其義申於各上憲每行文按人發給每名

分五六十金三四十金不等人號之曰孝廉田亦美名也
汝杰捐貢生歿未久其從父曰張廣東或曰張阿長

購藏朱霞

堂所刊全蜀藝文志板片

大召寺名老木郎樓高四層上有金殿五座殿宇闌干皆
銅質溜金輝煌壯麗珍寶畢聚其內神佛萬千亦有唐公
主像來時年方十二也多爾吉拔姆宮在羊卓白地海中
海中有山山上建寺極宏麗有瀛洲蓬島之迹姆云係北
斗之精所化牒巴三節亂藏時化猪遁去語甚誕計康衛
藏三處上冊著名之寺三千餘支糧喇嘛八萬四千餘其
不甚著名之寺廟喇嘛尤多兵器劒長五六尺劒有四五

尺長者大召寺門外有唐蕃和盟碑牛僧儒等姓名尚在焉

清溪庫藏牛皮甲甚多討膽對時獲諸蠻人輕而堅甚便於體咏之云犀甲輕矯奮爭先鐵甲耀日軍容鮮有客來談牛皮甲清溪縣庫堆百千片片刀截僅方寸漬以生漆年復年繩貫若銜尾片綴如連錢蓑可比其輕鐵未等其堅下不掩胛上披肩矛刺不入矢不穿夷匪奔走履山川橫突堅陣仰射天有甲足深恃那肯輕棄捐何故爲我獲客云聽吾宣堂堂對陣無與敵操刃挫折似空拳蠻人赤脚走如飛誘入深谷爭向前深谷徧布鐵蒺藜鋒利刺足

踣且顛捆縛如豕逃無路蹈藉死亡溝壑填出奇決勝善用權破其所長攻其偏知彼知己計萬全能戰能守可防邊吁嗟乎良醫無定藥牛溲疾可痊良將無定律制敵謀如淵伊昔劉縱守斯地誘之出巢聚殲旃及茲瞻對破狂寇策定不懼道路艱始知大帥貴智不在勇用眾那如威令專不信請看清溪庫欲將皮甲城門縣

蔣心餘先生詩與袁趙齊名足跡未至蜀而咏咂酒一篇四川通志載之足資掌故一門子弟皆好客喜遊談笑風生時人謂之蔣派子君質能讀父書精篆籀著墨餘書異不盡載鬼狐前輩軼事亦往往見焉記吾淄孫公子中酒

臥夜半門闕有姬長二尺許面黑浮白繞床走叱之忽登床覆壓其身大吐滿面口不能呼明日視所吐皆瓜瓢也至冬掘地窖花有藤根粗如臂窮之得大冬瓜如所見姬形剖之有血云于崇敕說孫公子未詳何人于君新城孝廉負拳勇爲令時蠻夷錯處地險俗悍深山命案有不敢親驗者于欲親往胥吏勸阻弗聽半途差役多逃行將近矣甫登峻嶺見多人執械林立輿夫委之而奔一人貌猙獰伸手入輿欲捉令出于手揮其人跌數步外遂跳出復一人至手仆之無敢近者呼夷人肩輿往驗無不從命因蔣記于君言附記于此君質名知白子立仁號完卿以知

縣分發來川現署樂至

深林杜宇巫峽猿啼供古今詩料二物不獨蜀有也而在蜀最爲關情郫縣有杜宇城或指亂塚中高大者爲杜宇墳亦無確據咏之云荒林古墓曰平西灌口江流繞故堤芳草落花無限恨杜鵑城裏杜鵑啼巫峽自夔州以下至巫山嘉定府亦有三峽見李白詩軋軋蘭橈夜亦忙嘉陵江碧水湯湯清溪明月峽名連三峽不待猿聲亦斷腸

青城山常道觀後有泉深僅二尺子寅辰午申戌六時水盈丑卯巳未酉亥六時水涸謂之六時泉泉清正好觀山青時絀時盈未暫停不與江湖共消長神皋呼吸自通靈

終老林泉更不疑沙平水靜境偏奇深山那用蓮花漏自
定盈虛十二時

署興文時因公屢至敘永廳廳界烏蒙芒部之閒爲走滇
黔要路縣與廳兩城相連中建橋以通往來俗呼上橋下
橋總名爲蓬萊橋楊升菴嘗題聯云一水跨雲虹洞洞重
門司鎖鑰兩城連地軸雙雙環壁拱金湯至今猶爲壯觀
惜邑人熊文燦作橋記深爲斯橋之辱文燦爲總理受張
獻忠之降責賂金累萬珠盈斗飽貨不貲家司農公撫鄖
陽累疏力爭極言總理之愚獻賊之狡輔臣誤信後必爲
患嗣昌怒因事疏劾罷官歸而穀城襄陽不守賊因入蜀

殺戮幾無噍類每過此橋有餘恨焉雉堞斜連兩岸旁蓬萊宛在水中央洪波流去聲鳴咽草沒銅駝怨夕陽狀元題柱起蛟螭總理揮毫又一時養虎殃民還自害清流不爲洗殘碑

涪州陳朝詩乾隆己卯舉人朝書丙子舉人朝易庚午舉人皆官知縣號陳氏三傑朝詩字正雅尤有膂力拳勇絕人任湖南安福縣誅暴懲奸邑中大治澧州有盜魁寥天則者徒眾數百沿江劫掠無敢捕督府檄詩往選健役五十人夜至其里舍宇壯麗垣牆高厚門盡閉詩踴身越垣數重至後樓諸賊在樓飲博詩一躍而上一賊執械拒捕

詩手格之立仆眾不敢動開門呼役入械賊十一人訊之
俱伏論如律一時有神勇之稱後丁憂歸有此廉幹之才
而終於縣令惜哉吾鄉周敬修先生天爵亦擅技勇爲令
時邑多盜其魁肩輿懸刀白晝率眾橫行所至牛馬財物
惟所欲周親往手自捕捉無得脫者以是受特達之知官
至督撫人固有遇有不遇也朝書朝易皆著循績以廉稱
沒後子孫食貧如故

周在任時湖廣水路舟行千里不
守夜無賊故也至今商旅思之

林錫三中江人年十餘歲道光戊戌夏隨母李氏渡江舟
覆錫三迅投急流中舉母騎其頸浪洄湧執母兩手衝突
數十里得上岸時同舟七十餘人墮水無一起者錫三以

童子引母得全天之佑誠孝也深矣

瓦屋山有數溪皆西流產紫菜僅一溪亦僅毛家溝一處必月滿時各攜筠籃據石上環石如髮長七八寸或四五寸當月午空明纖雲淨盡全魄臨水忽長尺餘隨長隨收隨收隨長大抵月透明則滋引稍晦便縮如故月西偏則歸矣入食品中清香勝於蘆山所產山谷未至其地遂使蘆之紫菜擅名物固有遇有不遇也

興文縣東有地名卜昏兩山環拱秀削嶽崎夾峙處有洞豁然高可三丈濶五六丈洞口龍爪花叢叢開放深五六十步有三柱屹立眾山滴泉下流成溪灌入洞中三柱如

門內深黑旱時眾秉炬入洞取水水枯深入行四五十里
取水而出燭已屢易矣人云洞深八九十里土人不能名
但呼石洞云

周思修字再齋金陵諸生癸卯來川威遠令沙澗泉延致
署中先是再齋父斯才號夢溪嘉慶十九年任成都別駕
再齋來尋舊遊性好爲詩七絕風調尤佳略錄四首聽笛
誰家金屋貯娉婷玉笛飛聲過短亭流水斷橋人獨立夕
陽紅處亂山青北郊道中鞭絲帽影獨徘徊滿眼春光費
剪裁茅舍幾家山四繞桃花紅出短籬來題楊視侯小可
軒圖青谿堤畔有人家撑起西窗看落霞曲折闌干高下

屋半圍楊柳半桃花冬日南郊道上雲重天低暮色來鴉
軍橫過雨花臺人乘薄醉騎驢去十里梅花一半開
壬午計偕北上與友遊陶然亭于文昌座前祈籤余得一
籤末二句云賴得官閒且踈放巴童蜀馬共隨緣眾云應
官四川第首句云長沙謫去古今憐非春風得意語也果
落第乙未大挑竟分發來川事有前定如此

鄂文端公爾泰總制兩川疏鑿江流灌田又數千百頃其
利益普然蜀地山多田少無論川北川西地瘠民貧卽東
南兩境江流不經之處甚多山田層累而上雖蓄有水仍
俟天雨略有乾旱民卽乏食吾鄉劉天民希尹有巴田詩

云巴田不成井逐壘細開塍灌水分山溜燒畚去野芳三
時勤不綴八口飽方能寄謝當塗子民心未有恆天民厯
城人

隆昌彭鋤讀書刻苦終老青衿而誠實公直然諾不欺某
家有鬼崇遭此者每破家彭未之知也偶過之其家聞空
中鬼語云彭鋤正人來我輩宜去鄰某外出病中爲鬼所
縛或呼彭名鬼卽解縛而奔病者爲人言之其爲鬼神敬
憚如此次子溼乾隆乙卯鄉薦任武強令

陳樸字文植乾隆丙子舉人從林青山學行詎矯矯及卒
青山哭之云聞過會知悔責善竟不違衰暮同心寡飄零

古道稀李上梅字友松工詩與陳樸同受業于青山青山
贈以詩云雅抱捐城府新詩落玉濱又云題詩拔秀親風
雅立意含真邁俗流

唐太宗放囚歸家至期皆歸獄後世循吏有效之者亦不
爽約近世無敢行矣至萬不得已審時度勢不肯膠柱鼓
瑟非具仁人之心置身家名位于度外不能也中江王履
吉署福建龍溪縣水太至獄有死囚三百急開門脫械放
之水平如數皆至此一事亦古今所少矣引見記名以
親老告歸著有歸田吟履吉字謙六乾隆丁酉舉人三臺
籍

蜀地多山山上可種稻徧山皆墾田直至山頂層層如梯
屏山令張曾敏作梯田行成都沃野號千里溝塍雲連平
如砥馬湖境內獨皆山可耕之士曾無幾居民無計治饗
飧依坡就坎分疆理山陡立今可柰何數尺一區顛及趾
百畝之賦田盈千犁雨鋤雲功倍蓰昔年我讀古人書曾
說葑田在海隅葑草結田浮水面與波上下成畝畝又說
梯田山窟裏雲梯百丈依山起澤居不識田爲梯今入深
山誠是矣梯田更比葑田奇一排山列一排梯獨立高岡
彌遠望龍鱗鳳羽競參差吁嗟乎愚氓那知有佳趣終歲
辛勤僅得度 聖朝蠲詔慶頻頒長官應恤山中賦

我眉多異僧能前知見於傳記者非一康熙中翰林毛大
可湯公別傳甚奇湯名紹恩號篤齋安岳人生時夢神捧
兒至而拜之曰吾紹興城隍神也既生我眉僧過門施之
飯請名僧以指輪計曰當以紹名他日東方有承其意者
因名紹恩字汝承嘉靖閒進士果知紹興府地卑苦旱澇
三江口舊有閘地夾兩山有石橫亘乃伐石建閘二十八
以時啓閉得良田百萬餘畝於是沃野千里民人食其德
建三江閘時因江流湍激不能築樁下樁夢神人告以需
用木龍血樁乃穩適有皂隸名木龍者召來語其故乞爲
養老母允卽捐軀乃沉之釘入樁下頃刻見血水上擁樁

固乃得施工不日聞與隄俱竣至今永賴焉民於三江閘
上立祠肖像祀之并祀木龍極著靈顯

岸高水淺勢難灌田以石壅水惟近岸通流浪急勢迅縛
竹爲輪大于一間屋謂之筒車高岸臨溪生苔蘚溪水溶
漾波清淺壅使急流激崖根自此筒車力得展縛竹爲輪
圓復扁截竹爲筒形製短以筒布輪雁齒排以輸入水輪
自轉溪流汨汨不暫停層層挹注往復返飛雪噴珠上虛
空勢如三峽水倒卷崖上方鄣稻秧青自近而遠通以筧
天生萬物聽人用播弄化機如戲玩灌園翻笑桔槔勞四
野無人車不緩地中風輪能知天水中竹輪能禦旱我本

山東識字農道旁見此驚雙眼安得臨河二頃田畢世爲
農從我懶

仁和費恩綸通判岳池迎太翁成勲于署好遊好詩風流
自喜登第後不就職而徜徉山水衙齋有林泉之樂亦高
人也金粟山房賦示三男通判恩綸巍峩紺宇臨清渠背
環山色腴不枯入門合掌先禮佛徧覽花木羅僧廬循廊
繞檻至後圃莽曠一片空山隅荒寒廢地約十畝亂鳴蜻
蛸逃鼪鼯連蜷桂樹已合抱風吹殿閣搖棕櫚上幽篁兮
下叢棘頓令勝槩埋烟蕪褰衣披榛高下看僅須畚揭勤
芟除我生夙有好奇癖力可圖者無緩圖巖脚影見石狀

怪務令搜剔窮根株遙岑幾朶蔽雜樹剪去定露青芙蕖
密竹只許刪去半竹閒結箇茆亭孤小雨初飛茶乳泛殘
月欲落琴絲虛眼前侈說亦神王何況闢出新規模造物
多時閔幽異人棄我取言非迂明朝準擬重入寺十夫荷
插隨老夫金粟山房落成三男恩綸賦三絕以擬西湖六
一泉作長歌示之蘇公隄畔六一泉負甍滿谷森參天亭
臺高出萬竿綠低壓青銅鏡面圓指顧全湖如在掌諸峯
倒影入畫船我本州人苦行役十年不到怪詩緣兒曹溪
口作通守僧僚增築屋數椽往古如來號金粟八分書刊
題榜懸獅子巖高覆屋頂隔溪眉暈聯便娟軒窗左右亦

修竹竹梢風起吹茶烟雖乏湖光潑眼至寺門方罨環水
田從來迹象貴神似設想忽到秋毫巔七字彷彿經道破
令我直欲袒兩肩惜哉山深人罕至敢將軼事希先賢我
今作歌和爾益神往何日與爾放舟同泛六橋邊

夾江杜丐四歲父歿母吳氏患足疾不能行丐亦五歲患
跛不任操作遂行乞得酒食不先嘗必歸遺母母七十餘
歲矣猶時焚香爲母祈壽時有賊被捕匿其廬力逐之子
以財不受人皆義之所乞無不予者邑令弓查知獎賞余
得句云人閒富貴知多少至性猶存乞丐人

夾江萬中一少時館去家四五里路經席河坎地有鬼魅

往來者多被其害中一夜經其地聞河畔柳林中呼上虞縣太爺救命跡之一人昏迷在地救甦問之云爲眾鬼所黽忽一鬼驚曰上虞縣太爺來矣故如其言呼救後數年中一領鄉薦又十餘年果選上虞令

中江諸生黃兩鉉讀書樓上夜有美女盛裝至曰妾與君有夙緣特來相伴堅辭不得遂與朝夕同起居能具美食異果莫測所自來嘗言鉉骨相具好惟兩肩寒將易之越三年泣曰緣滿妾去矣大難將至可避入秦從其言果獻賊屠蜀順治間賊平始歸中康熙甲子舉人

金匱顧晴沙先生光旭夢至一山登樓見青蒲座上舊案

中有通替發視則玉屑一函味如糖霜下樓見巖上篆書
曰甘泉後數年出守寧夏遊皋蘭山觀五泉所歷與夢無
異作夢遊五泉亭詩有云此事見夢久應效詎料此日重
遊觀著有響泉集入蜀詩更佳如燒痕空樹腹雲氣東山
腰水將浮石下秋不放山高然則先生殆分青蓮之玉屑
耶又有遊我眉圖彭樂齋題之云遺榮訪名山胸懷高北
斗大我千萬峯盡入才人手夢遊臥遊非超塵獨立者未
易言

劉光代字曙窗富順明經能文善書尤嗜詩家無石儲晏
如也遊秦數年歸稍置產業縱酒豪吟自放于山雲溪雨

閒秦中新歸喜嘯山龔大曉峰鄒十過訪盤桓永夕浙瀝
階前秋雨細淒清窗外蛩聲急幾番欲睡不成眠剪燭談
心永今夕我從雲棧乍歸來劒閣雄關親閱歷曾登華嶽
仰三峰更覽黃河千萬曲一腔硯礪爲誰消願向庭山叅
妙諦二湖嘯山別號花史擅詩名曉峰山人工寫意新雲舊雨
兩相投秋芷春蘭同臭氣呼兒沽酒遣清宵共醉去年歡
喜地吁嗟乎人生聚散本無常蜉蝣楚楚身如寄石上緣
能幾度逢自憐此會非容易傳語城頭鼓莫催天明客又
將歸去望華山有句云春回雨霽金仙掌風定烟籠玉女
鬟亦佳

曾枕雲氈溫江諸生屢薦不售試必高等爲人安雅與堯
東郎交善東郎以剛枕雲以柔愛其才規其過東郎感之
貧甚就食鍵爲與東郎別舟泊江口寄謫言一首東郎以
爲始讀令人噴飯徐讀之又爲淚下也觀音閣賽會喜陪
謝竹溪云小謝丰神冰玉容別來惆悵喜相逢機關鬥巧
談燈虎拇陣摧鋒制酒龍淺草落花春半老斜風細雨興
初濃可能聽講同攜手高閣登臨第幾重曾吟紅豆衍波
箋曾夢紅樓色界天綺語撩人畱色相閒情過眼付雲煙
何當懺悔狂奴態展拜慈悲大士前五十三參參未了拈
花又惹好因緣楊春樓索詩云憶自稠人獨識君情絲從

此日繽紛春風楊柳三生約秋水蒹葭兩地分有萍橋頭
同踏月無端夢裏亦停雲何時翦燭連宵話半話相思半
論文空洞真無滴墨來故人偏又索新裁醉鄉容我逸詩
債蠟淚憐渠慙却灰舊事翻成新格調殘箋竟遍亂書堆
旁觀未解撚鬚苦不住聲如雨點催

鄧碧宇平衫溫江孝廉洪雅學博雙溪夢峴之子童時嘗
與曾枕雲堯東郎遊詩多豔體年十九院試考古已錄第
時疫未及入場而卒春宵卽事云狂奴故態未全非記取
逢場作戲時底事春風不相識也拋紅豆惹相思

秀山尉陳兆沅浙江海寧人道光丁酉權安岳典史謝賈

浪仙墓云蹉跎莫怨一官卑遺愛難忘此日思秋草荒原
埋瘦骨招魂淒絕夕陽時當年薄宦誤才華遙望燕山驛
路賒家樹臨風吟不絕猶疑哀怨效長沙

劉雲船霖其先江西南豐人祖父官蜀故生長於蜀援例
得京秩未就家居課子於故紙堆中得高曾遺稿手自編
定性嗜學旁及醫卜青鳥家言善琴偶一作詩雨夜云街
鼓隆隆急寒燈一豆青撐雲高樹轟行雨毒龍腥神王詩
因健心平事久經偶然清籟發仙梵隔林聽雲重千山壓
風狂萬樹號噤人涼氣動警夢析聲高冷暖時無定奔馳
體久勞悔深思佞佛何日放屠刀七夕云雲錦無心自卷

舒何須花樣慮生疎年來世事翻新巧只恐天孫巧不如
雲船兩兄遠宦賣田獨力葬四棺以貧自安

倪順菴釣邗縣人父朝俊以刺史權漢陽府卒公虧私累
逾萬金兩兄宦他省未至撫軍召問以一言感動撫軍爲
彌補焉人服其能僑寓成都兩兄相繼卒家益貧或連日
不食老母甘旨之奉未嘗缺母卒哭不絕聲鄰人皆爲不
寐性慷慨好議論述懷云小技雕蟲不足工縱然落拓亦
英雄感恩報德尋常事權付梅花一笑中

宋屬仙紹瀛雙流世家子父爲雲南文山令謫戍伊犁卒
痛哭請往奔喪家人以年方十五不許固請而往萬里外

扶柩歸一路告助資斧無圖識與不識皆嘉其志也有紀
行草入都別友人云瀕海歸來計六年驪歌再唱杏花天
愁生驛路斜陽外夢繞園亭綠水邊歲月催人難自己情
懷亂我豈徒然相思相見知何日只祝前程早着鞭

吳小同名丙浙江歸安人遊幕至川談笑詆諸聞者忘倦
七夕詩云清淺銀河漾碧虛深宵涼露滴如珠相逢莫漫
傷離別月窟人還夜夜孤

蕭澄字鑑湖安徽人父牧河南隨侍任所以縣丞分發來
川越二年仍返中州和人韻云南船北馬歷居諸海內論
交把袂初客到接談情欸欸倦來就枕夢蘧蘧文章共道

枚舉敏禮法從來阮籍疎我本無才甘末吏行歌坐隱樂
何如

弓菱溪翊清刺眉州政尙仁慈民稱弓漣漣署後平田如
郛直接城根公餘閒行塍畔與農人話桑麻或贈以詩每
夜命子姪同坐聯句不工者罰以酒喜扶乩乩走如飛作
田家詩百首一一爲和其韻子嵩保字生岑以舉人候補
中書注銷後登進士以知縣分發江西弟芙江岷保亦以
縣丞分發與同省生岑和楊雲卿早秋漫興四律云渺渺
蓬山夢屢訛壯心銷減學狂歌聞中風物關懷切悟後雲
煙變態多長劒孤琴空愴懽朱顏綠鬢易蹉跎維摩一榻

渾無奈且上高樓踏軟莎夜涼似水坐庭蕪天際秋雲淡
欲無老樹低頭如我倦孤花搖影倩誰扶雨添曲沼跳魚
子風動高枝墜木奴莫笑苦吟猶未就推敲直擬析鉤銖
幾回咄咄欲書空咫尺瑤臺路未通拈到江毫傷別易吟
成楚調寄情工愁深蜀道千盤黑夢醒京塵十丈紅迴首
行蹤還一笑無言獨自立西風綠荷亭畔夕陽浮閒倚疎
簾咏玉鉤客意冷於前夕露詩懷清似早涼秋蟹啼石砌
金風墜星轉銀河璧月流翦燭與誰論往事宵來鮑照在
南樓笑江訪王遲士不遇云竹樹陰陰晝掩扉白雲長鎖
敬之闌多情最是花間鳥起向池邊引道飛和雲卿咏菊

韻云夕陽滿樹爛紅霞籬畔風過菊影斜短髻看來宜插
帽淡煙裊處似籠紗三秋每入名人句九日相尋處士家
耐得寒天同結契此花何必讓梅花楓林黯淡月昏黃欲
覓僧鞋赴上方萬里歸心三徑杳半牀幽夢一庭荒秋容
寥落如中酒晚節清高不畏霜獨立西風看未已塵心俗
慮并消亡

星岑名崙保菱溪之姪幼失怙恃菱溪撫之如子與生岑
笑江極相友愛亦捐佐貳歸里後不知分發何省和雲卿
菊花云連朝煙雨繞疎籬裊裊寒花瘦莫支樓子紅開宜
插髻麝香黃透好吟詩情懷淡泊何人識品地清高祇自

知羞與眾芳爭豔。冶不須春露發華姿。秋花秋士兩相同。
雅淡由來是素衷。折取直思供硯北。扶持幾欲向籬東。餐
英不必三閭似。得句難如五柳工。把酒畦邊頻顧問。問君
誰共傲霜風。

沈珏齋鳴珮浙江歸安人。遊幕四十年。在榮註易多新解。
偶爲小詩。春日卽事云。睡餘憑檻望蕉雨。綠油勻。新柳迷
溪角。香泉瀉石唇。客心驚去日。年老喜當春。不盡婆娑意。
覓解恐無人。

邵春濤繩清其先江蘇常熟人。以外王父宦齊魯。生長歷
城。游幕中州。旋復由滇而蜀。自慰云。世事原難定。毋庸喚

奈何無情空色相有意卽風波頃刻功名幻百年歲月多
人生行樂耳不必發悲歌

蓬溪縣飛雲樓元至正年建規模宏敞潘退菴登之作醉
歌行云春山着花山欲然馬蹄踏破千溪煙把酒臨風浩
歌發狂來不讓劉伶顛百尺危樓倚赤城憑陵忽動故園
情故園書信經年隔回首金焦萬里程眼看春色十分去
春從何來去何處花開花落無人知鳥語溪聲盡談助一
歌興猶豪再歌意已酸自古滄桑有如此况復崎嶇蜀道
難金屋當年紅粉盡酒鑪半夜青燐寒對此風光那堪嚼
披襟一酌又一酌縹緲須登最上頭極目天光一寥廓琴

鶴隨風下訪一時意氣凌空上莊周爲蝶蝶爲周我亦憑
虛御泱泱鳳飛千仞莫張羅龍潛深淵孰施網世事如碁
著不高長亭短亭何勞勞吳市被裘阿誰子蘇門長嘯卑
汝曹請從縣圃拾瑤草三島十洲人未老君不信飲我中
山千日醇醉蹋崑崙使西倒

趙竹菴桂生補龍泉驛未赴而卒子清源號稚竹詩有父
風錦城眺月云我家滄海角身在錦江頭今夕涼風起天
涯一樣秋月隨人作客夢與水東流鴻雁此時至鄉書寫
寄不翦燈賞菊謹依家大人韻已涼天氣一塵無曲檻疎
櫺入畫圖漸覺庭除蟲語亂乍來風雨瓦聲粗秋邊落雁

書初至客裏挑燈興不孤閒到枕藤吾意足未妨清夢遶
江湖宿簡州云筆硯初開爐火熟亂題詩句酒微醺山空
樵語落紅葉寺遠鐘聲帶白雲風過炊烟萬戶動雨餘樹
杪百泉分扁舟今夜城南岼近水樓臺起夕曛少眉弟侍
家大人自瀘州上省一片微雲淡河漢數行新雁小闌干
挑燈互解詩書味加飯同依父母歡小院有花秋爛漫故
鄉無事月團圓他年一棹吳江水好向煙波執釣竿

葉錫寶號楚珩浙江龍游廩貢生平作詩甚富攜子恩培
遊蜀多感慨之音不得志以歸畱別云敝裘風雪去來身
行李蕭條不諱貧浮漢張騫遊與減登樓王粲客愁新厭

聽蛩館三更雨懶逐蠶叢十斛塵松菊尙存歸亦得布帆
無恙莫逡巡久把猪肝累季君寒梅客思動紛紛心如退
鷁飛多倦酒到歌驪飲易醺萬里看山畱爪遠四年飄梗
促萍分此行不負登巫峽歸夢堪攜兩袖雲一夜鄉心入
雁先催歸不用聽啼鴉早知人海難存脚翻悔湖山浪着
鞭撿篋笑無金半黍照窗還有月盈船安貧里社逍遙好
休傍雕樑空自憐隔歲陽關唱渭城今朝攬轡始登程韞
脂喜作還鄉計放艇聊安盼遠情充橐空招榆莢影催裝
頻喚子規聲世途况味嘗將遍自笑閑雲出岫輕結束征
輪逸興飛旅中惜別轉依依恐教稚子驚呼客未必山妻

不下機異地縱難求所欲衰齡猶復莫知非斷蓬豈是匏
瓜繫東道何妨襍被歸阿翁南返子西畱彈鋏天涯各自
謀桃浪浮香流別緒柳絲牽恨綿春愁三篙烟雨添吟興
一路鶯花快旅眸慙愧無端空入蜀敢誇詩草紀清遊餘
二首未錄

鄆縣徐雨帆子來父發祥號瑞菴廩生性樸誠寡言笑課
徒之暇間有吟詠題踏雪尋梅云梅花深處雪霏霏踏雪
尋花取徑微折得一枝歸去後花香雪影滿寒衣秋日村
居云林薄高秋迥層陰一徑斜招雲來補屋近水自成家
林密孤花晚牆低涼月賒小園幾延佇扉扃少人過

資州西鹽井溝有硝洞深杳可數十里有人舉火以入見
石壁中多佛像藥爐丹竈咸具鍾乳下垂森如玉笋有蠅
蝠大如鳥倒伏穴間其深處有橋有池魚不盈尺而色黑
然多岐徑旁穴纍纍入之亦深邃莫測遊者懼火滅而返
故終莫能窮其境焉

門人徐甫帆子來鄆縣人好詩甲辰計偕北上沿路有作
嘗題楊文泉涼山踏雪圖云涼山山外人踪滅涼山山凹
裸夷穴刮地罡風飛羽書人面凍皴馬蹄裂先生奮臂起
瘡痍天助白戰無勁敵銀沙千丈湧成堆烏路猱蹊何處
覓邛笮西熨勢荒涼塘岈寮刺復偃仄不跨雕鞍足御風

軍威如天汗雨熱恩周挾纘義同袍抬鎗負戈成羽翼踏
破冰天氣蒼莽四無人聲山寂寂毒瘴蠻烟一掃除盡使
烏頭氣先墨身爲鐵漢矢請纓不數蔡州夜殺賊蠹茲么
麼豈敢跳飲羽刷馬直突入山腰林鱗橫滇雲玉龍飛空
鬬風力健步前驅偵夷情外扼其吭內剗脅腰間秋水三
尺寒冰髭冷斷銅面濕犁爾沙幕焚爾巢雷殷震天星奔
鏑蛾伏奎踞歷駢崖巢傾卵壓跡銷絕電掣電掣跑紅旂
齊唱凱歌爭報捷噫嘻先生忠勇屹如山先生清白皎如
雪笑他貂帽狐裘人烹羊煮酒徒泄泄

丹陽陸炳字赤南號藜軒乾隆間遊蜀著有劒南草多記

風土其紅花行云簡陽四月採紅花簡州城門動塞車買
花盡是蘇杭客姑蘇餘杭道路賒爭發紅花趁頭水日行
千里自天涯內江關稅暫停阻半月爲限悉抵家抵家之
時方仲夏顏色鮮新染輕紗輕紗染出隨刀尺衫配羅襦
巧樣誇千門萬戶絢光采虎丘西湖日初斜照見山水襯
佳麗樓臺無處不雲霞物貴鮮新時須早顏色何能恃常
好不見年年採花人嫁衣未染愁容老川馬行云松潘馬
大如牛疲建昌馬小如驢蹇川西川北馬中適可騎川南
川東馬少難爲選自來馬多惟唐時七十餘萬供驅馳祥
麟鳳苑不足數別有飛龍最稱奇唐馬不自川中出幽岐

涇寧八坊實宋置諸監耗民田民生從此遂蕭瑟我朝
重民不重馬卽有用時採里下前年命帥事南征蜀地就
近馬可跨鞭策自能效馳驅飛騰時或似龍駒兩番官買
誰敢匿騏驥一空西南隅將軍練兵復奏請上賴聖明
爲耿耿下詔罷選畱有餘四野歡聲通市井

申畚夫子原籍璧山寄居郫縣嘉定郡伯邵蓮溪先生夫
子典試山東所取士也迎師主九峰書院固爲作養人才
計亦以師弟相依爲樂花朝月夕文讌屢開乙巳秋申畚
師在署賞菊首唱七律又作菊花問答郡伯皆有和作旣
而招集僚屬茹犬令元圃董庶常榘園同師爲餐菊之會

蓮溪先生作詩二十餘首妙想天開奇趣橫生又步申翁
師賞菊原韻分咏各題層見疊出指揮如意美不勝錄姑
存數首畱爲嘉郡異日佳話餐菊云曾聞餐菊可延年若
箇遐齡壽比天且把寒香供一飽大家半日作神仙薰香
已喜花成海摘豔又驚霞燭天怪得靈均文字好落英撐
滿腹便便檢遍郇廚食品低頻將消息問東籬主人新結
黃花癖不號蓮谿號菊谿無那止園閒地多種花稠似種
田禾園丁屢報秋風起不戀蓴鱸總爲他笑余風雨爲花
忙終日垂涎口角香想是籬東老虎士也因指動始還鄉
水晶作箸玉爲盤倏忽霜風起舌端只恐老饕秋氣重夜

來肝膽照寒夫子風情本淡如南豐親奉瓣香初近來
不食人間火探盡英華補異書燦燦繁英落地纔那曾十
萬費錢來斯筵莫道真清絕也爲黃金笑口開和申畚夫
子賞菊原韻時序何期忽歲寒止園修竹幸平安二三君
子多清興十萬秋容亦大觀獨樂爭如同樂好看花誰識
養花難年來多讀橐駝傳庶卉繁滋是見端折桂一枝來
廣寒青雲擡舉近長安當時求赤言多異曾許龔黃政可
觀三十年來未能信二千石後益知難世途厯盡聰明減
小事糊塗似呂端和王春航步韻詩春航詩多浮譽作此答之邇來聞
見更心寒徧野哀鴻幾戶安縱以隔疆聊自解其能袖手

作旁觀宦情已似秋雲淡世路眞成蜀道難固圉聊行團
練法閭閻叢弊又多端憶我家風本素寒閉門高臥亦袁
安生機自覺胸中滿世事曾從局外觀未仕以前談政易
出山而後問心難古人最重鷺鳴友忠告何妨叩兩端又
作雜題數章呈申畚夫子廣廈誰憐多士寒弦歌聲斷我
何安先王之道斯爲美小子學詩可以觀萬里同風傳鉢
易百年異日樹人難倘教虎觀畱宗派定溯之他取友端
學校聞道脣亡齒亦寒吾民何敢恃偏安須知救火鄰家急
莫學陳兵壁上觀騷獸自宜張網密愛苗翻覺下鋤難仁
人寧使吞舟漏比戶株連慎發端緝匪

茹元圃金進士陝西漢陰廳人樂山令在都作二十四不
詩仿竹枝體亦諧亦雅觀其詩可知其人卅年五度上皇
都一度風光一度殊惟有癡人癡不改回回依樣畫葫蘆
不謁權貴紛紛投刺志何居每日朱門競曳裾傲骨一方
誰贈我早觀劉一丈人書不狎優伶梨園花似錦成堆箇
箇魂銷歌舞臺自顧髮頽難倚玉何勞媚眼向吾開不吸
鴉片鴉片奇烟吸快哉人人時欸把燈開只因臭味差池
久那解醍醐灌頂來不買鐘表懸鐘帶表糜金錢寸晷分
陰巧測天囊少餘貲人嬾散任他日影度花磚不聞鼻煙
異香撲鼻是聞煙此竅難通我漠然漫說玉壺無價寶看

來不值一文錢不關娼燕趙佳人縱有情甘居蕭寺怕尋
盟非關愛惜纏頭費恐蹈青樓浪子名不製玩物好求奇
玩擲千金彝鼎圖書仔細尋一介何曾知博古惟防喪志
凜前箴不賭博呼盧豪興果然豪一擲千金膽太高最怕
輸贏分頃刻富兒旋作乞兒號不下館雅座宏開百味新
牀頭金盡但安貧聞香不敢停車問空作屠門大嚼人不
飲酒舉杯便說酒中仙斗酒詩成幾篇怪我詩才遲鈍
甚原來不識李青蓮總結廿四油腔不當詩寒窗無事寫
吾癡癡吟寫盡癡人態笑倒旁觀垂角兒和邵蓮溪先生
餐菊云餐飽黃花興未闌東籬不信就凋殘週身傲骨憑

君換好耐冰寒與雪寒沉澀一家性淡如花觴酌趁小陽
初賞心自在鹹酸外食譜從今有祕書

王映東號辛塢江西金谿諸生戴耕野莘令丹稜邀其來
蜀所著看山樓詩集中有蜀遊草一卷丹稜女云來往路
三叉采桑兼采茶若將花比貌喚作羌桃花夔州竹枝詞
云輕舟來往辨桅杆來是雙桅去是單幾度黃陵祠內祝
祝郎處處獲平安過借風臺云借風人去此臺空牘有經
霜一樹紅我是錦江倦遊客東歸只合借西風宜昌口號
云吹浪江豚觸石回彝陵山色望中開巴水巴山迎復送
益州無夢不重來其子名式穀號蘊齋爲榮縣尉鄭竹泉

贅壻亦喜作詩上灘吟云上灘吟未已愁思一江深楚水
看將盡巫山夢欲尋書憑征雁寄詩入斷猿吟道路誰知
已濡毫寫素心巴江雜咏云山頂濃雲疊疊堆山腰茅屋
小門開輕舟一葉穿雲過只聽濤聲怒似雷寒梅嶺接綠
楊隄一望人家種麥畦積雪未消泉水出白雲深處有猿
啼官舫揚旗舵尾低雕窗面面瞰玻璃迎船送到夔州產
雪棗冰梨賤似泥峽水深深灣復灣岸旁磈磈色爛熳笑
他宦客歸裝俗輕筋無人載石還灘名下馬只行船落盡
飛花樹樹烟一曲清歌畱客飲旗槍新試峽中泉

門人徐宇藩子來古詩筆力挺拔有奇氣自輶携詩二冊

請質中多魁壘之作不盡錄其棧道中詩似得江山之助
入北棧君不聞危乎高哉蜀道難乃在二千九百石棧排
雄關關門陡插大小劒谷暗崖陰風雨變天蓋青圍垂一
綫有客來經途險亭曾聽閣上雨淋鈴蜀山秦樹勢窮冥
何年鑿破混沌竅金牛玉輦交引導路關崎嶇峯聳峭蕭
蕭班馬鳴不歇磨牙怪石向人立礮礮銷盡輪蹄鐵山長
水遠無已時慈母手縫遊子衣星霜嚴冷雨雪霏劒門晚
望兩壁峭直仞幾千大劒小劒高刺天造化洪鑪陰陽炭
大工鎔鑄混沌前飛來健閉蜀門戶行者輦者任者色如
土下有窅深蹊壑蟄龍蛇上有逼窄岩穴踞豺虎我來茲

樹披榛袖底寒雲撥直上青雲端四圍幽暗猿狖叫山長
水遠行路難懸翠屏列丹嶂設險真爲天下壯控制蠻夷
收荆吳鎖鑰扼塞牢保障風磨雨洗千劫歷劍氣冲霄山
崩業義馭赤日下巖巔迴巒忽斷空翠接感慨昔時思往
事幾人稱王幾人帝躍馬鼓怒井底蛙井吞割據何足計
亙古劒山屹峙劒水流山環水繞塵盡天地秋下以鎮坤
維上以曜井絡此山此水直可全蜀第一名勝收五丁關
懸泉飛雪聲汨汨雲棧梯空勢兀兀山重水復不見天七
十二渡石頭滑俗云七十道脚不乾憶自四萬八千年以來毒草惡
木蛇虎窟冥濛斷絕飛鳥路嶽巖刺誰能越直從天外

飛來五丁士併力擔當千鈞如一髮鉅手鑿破混沌竅不
倩神工鬼斧伐兩壁中通一綫天危岩接翠凹且凸將枯
未枯樹蒼古欲墜不墜石碑硯關北萬壑直吞漢水源關
南一丸冷挂我睂月門逼窄路曲盤行人七步九憩歇烟
藜雪屨撥霧踏寒雲此山長峙水不竭我來那見石牛再
糞金但見墾荒峭壁費盡黃犢力

郛邑劉畹香仁溥壬午副榜戊子舉人性俠烈事繼母孝
著有杏春館詩竝覺世眞經試帖尤長於七古雄渾豪縱
下筆立就黃河行天上銀河揚清波波光皎皎如鏡磨源
分一線成黃河如何奔流人間昏墊多我溯黃河源發派

崑崙山積石龍門勢尙束以下千里一曲蒼鰲碧鯨吹浪
圓怒噴濤頭成奔川川廣汜濫沙無底難跨虹腰時雁齒
漂山轉石浮孟津往來行人悵瀾瀾去年桃花漲潰蘆葦
堤北流活活樹杪低我昔曾臨岸冰凝艤艫雪如霰舟子
僵凍面鰲黑漿櫓欲搖搖不得鱣豚掀翻天墨墨今我來
斯雷轟電馳深潭將出青蛟螭黃沙坐飛白雨吼人馬欲
挾風雲走君不見腰間寶劒橫青萍斬妖截魅驅雷霆忠
信肝膽平洪濤那怕水族博浪連天高駕將千里之槎飛
日月天風浪浪吹過水晶闕

鄆邑上舍王小嵐輿與其弟茂才栢坪碧山娛情詩酒聽

雨聯牀亦風雅人也冬暮卽事霜飛紅葉照樓西四面蕭
條景色淒凍雨生煙連晝黯寒雲隱日通天低無多鷗影
空潭聚不住鴉聲隔岸啼獨有漁翁偏耐冷一竿和雪釣
鯢鯢栢坪碧山步小嵐家兄咏新柳原韻淡著鵝黃是斬
新筆端寫照苦難真偶思客舍殷勤意半露章臺綽約人
李氏青袍何日染楊枝翠黛幾時勻試來江上從頭看淺
淺眉梢解弄春

邨邑諸生幾安敬修已傲岸不羣作詩亦清矯初秋夜卽
事沉沉淡月雜疎星粧點風光上畫櫺瓜葉有聲鳴蟋蟀
稻花無力墜蜻蜓一燈翠影秋先到半榻涼陰睡未醒把

酒放歌彈古劒舊遊何處望雲停

道光辛丑余攝興文篆山邑荒僻苗夷雜處民蠢蠢與鹿豕伍而節義性生有卓乎自立者不可沒也廩生石雲峯之女笄歲許字同邑楊文遠婚有日矣文遠因赴試不售外出屆期貞女于歸夫家奉事舅姑盡婦道旋接凶訃文遠客死於外女泣血誓不更嫁父母舅姑委婉譬諭之終不移嗣舅氏沒朝夕奉孀姑二十餘年怡顏承志姑忘喪子之痛三子各爨獨與貞女同室女以紡績給甘旨抱從兄子在川爲嗣姑沒女喪葬如禮設神位供諸其室每食必祭鄉里不知敬重女亦不自知其事爲可表也前吾鄉

楊纁亭玉堂宰是邑有與女訟者堂訊乃知其詳賞歎稱
奇爲直其事立爲請旌且作詩以志詩云石氏女貞如石
石可轉心不易吁嗟無人表貞迹問名甫納采一與之齊
終不改標梅天桃賦及時思變季女訂歸期何意丈夫四
方志蓬矢桑弧不可羈父母有命施矜結褵往之女家無
匪無儀綢繆束薪三星燦香牢誰共悵別離敬謁舅姑登
北堂殷勤慰籍語彌長輦絲未解理椎髻榛栗作脩備酒
漿冀慰椿萱不至一日九迴腸藁砧應未遠庶幾返故鄉
天道何茫茫異域慘淪亡椎心泣血悲蒼黃仰視庭幃益
淒愴子亡婦畱子未亡死者已矣毋過傷勉爲笑語進壺

觴暗灑涕淚沾衣裳情輕義重可若何形存志隕誓靡他
阿翁慟赴泉臺去空餘雙棲榑槩邁鐙暗淒慘人何往門
巷蕭條鬢空皤形影相依廿餘載疾痛疴癢勤撫摩豈惟
甘旨紡績供承顏怡志養天和姑曰清風倏作肅女曰寒
衣早已疊篋簏姑曰陰雨灑霖霖女曰牽蘿現已補茅屋
姑曰禦冬何所畜女曰行野采蓬兼采菖子亡不須痛夫
逝不須哭得女晨昏共寒燠有子有父慰煢獨吁嗟兮楊
氏婦石氏女璞玉無瑕懷瑾瑜寒泉無溫澈冰壺藍橋未
識何郎面黃鵠悲歌胡爲乎重陰曠霾不見日胥井沈淪
空泣珠我讀列女傳如此高行或亦僅有而絕無迄今姑

已沒心已枯螟蛉育子忘勤劬雖爲楊氏婦猶然石氏女
吁嗟兮是誠巾幗中烈丈夫

有宋喬林者以未入分發坐藏在邊值西域用兵責土司

供烏拉千頭運軍資

烏拉番牛邊地山險非此不能登

各土司不應軍行

急領兵者計無所出宋入見請以身任是時土司亡妻掌
印雄長諸夷宋與有私以情告女土司傳令各處二日集
烏拉千餘事乃克濟凱歸奏其功 純皇帝大喜於奏摺

喬林名旁硃批竟是能人以知縣用遇缺卽升後以羅江

令升江北廳

特旨授夔州知府

陳古棠尙邵江西崇仁人需次在省爲子娶婦婦甫入洞

房瑁忽仆地氣絕內外賓客聞然俱散古棠以婦未與子
合盥與送女者議仍以彩輿送還婦泣矢死不歸卽爲瑁
成服至今守節余與古棠交未言及後聞諸他人乃賦以
詩笙簫闐咽擬瓊島新婦登門如花好青廬羅帳懸流蘇
共祝百年賦偕老華燭照耀壁成雙郎如玉樹忽傾倒嘉
禮觀成在頃刻頓將歡喜變煩惱戚友駭歎僕御驚此意
真難問蒼昊彩輿在門盥未合促命返轅歸宜早女淚如
珠心似冰矢死靡他節自保生未同衾願同穴夫瑁靈牌
懷中抱卸卻華妝服衰麻泣血染衿拜翁媼世間孀婦當
青年名流歌咏盛文藻那料花燭賦柏舟交拜方畢事草

草洞房立驚拆鴛鴦華堂未遑摯栗棗淒風冷雨閱春秋
有客傳述心如擣我與古棠誼素敦慶被閨門蘊瓊寶欲
作歌詞播芬芳硯田外荒筆花槁苦志冰操終不磨長如
江水流浩浩婦杜氏原籍湖廣住省垣古棠現任新繁
雙流蔣曙東啓南魁梧長髯目若流星多智略談吐豪爽
拳勇可敵數人望而知爲傑士也以孝廉計偕北上乘舟
由夔巫三峽而下至湖廣地見匪徒自山下搶掠客商已
幸得脫慨然曰吾他日官此必翦除若輩後得縣令分發
湖北初署篆遇盜處卽其所治也擇勇健差役探明某處
爲盜所屯聚前後埋伏躬率役以往賊二百餘猝爲所乘

跳免者僅七八人餘盡繫以歸盜風頓息果如所志奇矣
補房縣令上憲知其善捕賊委署某縣故盜藪也竟以劇
盜未獲罷歸以此始亦以此終又奇矣

成都楊對山燮癖好金石篆刻極意搜羅費二三千金所
刻圖章皆摹周秦以來鐘鼎盤盂下至瓦甓無不遍肖大
小不下兩千餘方出門卽載以車裝橐纍纍日操鐵筆從
事至忘寢食嘗北上取道夔巫沿江陵至黃鵠磯風雪滿
天登樓命酒謂其友曰吾所鑄足供石倉祕府之玩今修
蜀志可備採擇後大挑選梁山學博未赴卒其弟曉山名
森爲刻印譜八冊戴葵門顏魯愚兩先生深推重手雕印

章子令旭令暉寶藏於家

張介侯爲作序字極古雅惜刻者顛倒其文

蜀州東北境石魚江金馬江支流也江澚有石魚寺創自前明燬於兵燹僅存斷碑一二鄉人倡募重修祀文昌關帝後掘土得石鯉魚一形製生動鱗甲時有沫水以占陰晴有驗鄉人神之更作一魚爲偶劉芳皋作詩記之石魚寺中石魚古鱗鬣爛編蝕苔土飛騰變化定何年阜江吼浪疑風雨阜江東流金馬嘶金馬神歸越舊西秦庭空自畱陳寶漢使何勞祀碧雞此魚當日作何用厭勝豈亦如五犀不然銀漢精星墮暫向滄江學高臥三十六鱗歷歷眞八千萬億匆匆過琳宮有記認前明巔頂豐碑幾變更

石鼓山頭經再劫木魚聲裏悟三生當時青嶺撓川陸妖
褻颺馳滿巴蜀梵王宮殿化飛灰釋子蓮花走麋鹿此魚
當時何處潛鯨鐘鼉鼓空華嚴昆明劫火埋黃壤寶像泮
闕失拜瞻吾聞龍門之鯉解幻化萬里長風直凌駕何爲
守涸涸塵緣暴腮不遇琴高跨鳴鶴山前石鶴飛蜀州仙
跡記依稀此魚墮落未解脫護屈乃抱潛龍譏天晴則乾
陰則濕此魚亦似善知識神物影現自有時千年阿護維
摩力卽今殿宇重輝煌彤階石螭喜光昌緋衣懸袋科名
兆石魚精氣連穹蒼

張船山詩有逸氣破除詩中門戶之見一意孤行目空一

世蜀中詩豪也歿後劉止唐沅弔之云西蜀江山險詩中
得伯才當關爭虎豹破峽走風雷官薄名何重心雄事竟
灰羈魂猶崛強抵死傍蘇臺坡老儋黃後疏豪合似君
新詩世界開拓酒乾坤家戀江南好才羞冀北羣夕陽愁
白髮無那是招魂詩亦雄健五字長城其潼關七律亦警
策雄關巖業壓神州控制中原最上游城堞遠隨山勢轉
荆岐全自掌中收長河直瀉風生腋太華遙連月掛鉤自
昔不容豺虎踞強秦未必勝衰周

徐學津春江南武進人前濟南郡守惕菴大裕之姪也惕
菴父玉亭先生殉金川木果木之難惕菴在山東屢平反

大獄卒後無嗣天道難問如此學津太翁與楊菴太守同
居京師最久楊菴工詩學津漸染家學以筆墨遊幕中州
嘗與同人咏春柳用漁洋秋柳原韻甚工援新例以從九
來川候補屢以事至榮與諸詞人譙集鏡香亭卽席有作
云榮州去歲兩曾經今夕還來憩此亭萍聚居當春水綠
竹疎時見遠山青西園雅集宵前訂園在署西偏南畝農歌雨
後聽愧我無才甘落拓也隨佳客倒銀瓶

華陽潘蓉溪文鏡紫垣孝廉次子也家世以詩鳴蓉溪少
年喜爲韻語有蔚山詩草一卷駸駸與兄競爽送李三表
兄省親通州云旗亭酒熟暮春天攜手河梁醉別筵我愧

安仁閒作賦君依德裕遠籌邊時三舅在通州總戎幕君將往省飛帆穩

泛桃花浪柔櫓輕搖柳葉烟棣萼聯輝椿樹茂他鄉從此

樂團圓君到通州我益州相思千里路悠悠綠漪亭畔尋

芳躅紫石巖邊賦壯游俱在通州南燕信遙傳花市曉魚緘早

寄錦江秋榮歸戲綵娛親日剪燭開樽共唱酬

李硯蘭遊幕蜀中以能詩聞吾東楊纘亭在峩邊延入荆

席邊隅案牘清簡賓主日事唱酬和纘亭有句云雨餘遠

樹斜陽淡霜後羣山爽氣遒新雋可喜

湯氏南充劉成璋妻九歲爲童養媳及笄成婚生一女一

子年二十四而寡未幾子又死抱夫姪德煜爲嗣厲冰節

者五十年性勤儉常終夜織姑晚年半體不仁扶養盡力
數年如一日嗣子方襁褓撫育如已出及長督之勤讀中
拔萃科以武英殿校錄得教諭任峩眉榮縣爲母請旌建
坊受勅封焉徵詩成集摘錄以存其慨南充歲貢王秉淵
詩云風蕭蕭白楊路荒郊但有亡人墓蟲唧唧秋夜長月
明不照孤兒牀抱得螟蛉坐霜屋軋軋機聲動林竹甘旨
勸姑嘗詩書課兒讀五十光陰何迅速果然兒食天家祿
食祿天家母心喜庶可陰靈慰夫子吁嗟乎海可填山可
移乾坤大義誰撐持大義名不朽華表巍然高北斗門第
能昌節能守君不見劉節母威遠諸生王翥雲詩云織盡

人閒寡女絲離情惟有夜鐙知庭前菽水承歡日機杼詩
書課子時苦蘖回甘多異味寒花向暖發新枝果然後福
隆隆起紫誥鸞封降玉墀南充舉人任緯詩云清閨大節
一身扶百折難回女丈夫隻影早悲梁上燕酸心還碎掌
中珠聲啼蜀帝魂長斷淚灑湘妃竹亦枯尚有慈親常寢
疾幾回搔首向天呼健爲廩生蕭天錫詩云苦耐冰霜五
十春頻年組織剩孤身月殘天上愁看鏡珠墮掌中淚濕
巾衰念阿姑勤孝養愛鍾猶子續宗禋到頭贏得封章貴
史筆書來汗簡新榮縣歲貢王載熙詩云忍淚將雛茹養
親苦心原屬未亡人風瀟雨晦難回首地老天荒剩此身

倏歿童烏幾絕祀更無趙藥倍傷神
逖聞侍奉姑嫜日湯藥煎調數十春

孀婦撫繼子成立詩最難作榮縣郝元琛詩極恣肆太華
山頭十丈藕千花萬葉不受污泥垢天風吹落寄人閒紅
英化作瑤池母瑤池冰雪玉闌干曾經九轉鍊成丹迴憶
垂髫伴竹馬雙雙古鏡照飛鸞飛鸞一曲聲清麗玉樹瓊
花開次第昂昂夫婿駕長卿方期偕老共長生無端膏盲
藏二豎可憐繫命無金縷公子麻衣尙繞牀平陽嬌女泪
如雨一抔黃土六尺孤椿萱日暮近窮途寢門待養兒待
撫爭肯輕身似羅敷此心如古井古井無波能照影逝水

長悲臨江臺化石不到武昌嶺可耐孤生竹已殘喪明又
忍碎瑤肝青鐙孤對愁風雨東風別院覓芝蘭天產九莖
生不偶移來畫荻勞親手機聲不斷課兒書欲使昌黎文
章重山斗費盡媧皇鍊石心香分貢樹重球琳十載青袍
風塵倦三年太學惜寸陰校書天緣人爭慕騏驎奮迅騰
皇路慈雲絳帳幾春秋瞬息柏舟成薤露開卷詩廢蓼莪
篇服官又到旭陽天瑤臺鳩杖人終古鶴俸空餘十萬錢
吁嗟乎遇難識忠臣處危見節士天以坤維正氣畀孺人
不惜錯節盤根使其芳名垂女史巍然綽楔鎮南充勢欲
摩天氣熊熊買絲共把女貞繡繡出心肝玉玲瓏

德清蔡蕤僊游幕來蜀在重慶時值春社游女如雲一女
郎風姿秀麗訪之辛氏女也富貴者求之不願蕤僊媒訂
獨喜納爲小妻名鳳遷小字綠雲甚相得甫一載病卒卒
時蕤僊未見深以爲歉與人言及輒唏噓欲泣適在同年
沙澗泉幕澗泉來榮持長洲英玉高君綠雲小傳示余且
以蕤僊意囑余作詩蕤僊固深於情哉爲效長慶體作綠
雲篇以紀其事仙娥遊戲到人間青鸞飛到復飛還有客
微吟洛神賦何時再出蓬萊山蘭胎初孕曾占夢雲裏翩
然下彩鳳掌上有文字分明佳名肇錫已殊眾韶年十五
度芳春豔質靈心迴絕倫繡畫針摹宋北苑簪花格學衛

夫人儂家本在渝城住門外辛夷花滿樹深處幽閨嬌避
人一株芍藥紅欄護遲遲旭日上窗初釵墮烏雲對鏡梳
花壓翠鬟妝粉淺橫波一顧畫難如小院微風撲蛺蝶淡
黃衫子搖輕箑逢人斜睇羞舉頭脣破含桃開笑靨春社
年年士女盈粉黛如雲羅綺輕尋芳才子垂青眼鳳願求
凰與目成富兒豪貴心偏惱白璧黃金原非寶惜花御史
斷腸人暗裏朱絲牽月老良辰送上七香車小住錦城便
是家幸遇知音吟柳絮似曾相識認桃花追歎尋樂無不
有度曲彈琴兼賭酒人閒無此好姻緣枕畔盟心期白首
無端行李迫倉皇怕貌低聲問玉郎新愁纏我羅巾濕舊

物遺君玉玦涼懷蘊明珠期已滿柳絲難把離情綰感耶
恩重妾身輕相憶時長相見短班駝上道惜忽忽門掩梨
花細雨中翡翠薄衾中夜冷鴛鴦雙枕半牀空那料辭家
竟永訣入懷明月圓忽缺瑞麟墮地璋無聲病眼盼郎淚
成血垂危氣促細如絲遺囑寄郎大婦知三生石畔緣重
續萬里橋邊會有期此語聽來酸肺腑玉容那忍埋黃土
蘭房繡榻掛蠟蛸孤冢白楊戰風雨逝水流光歲又新遺
鉤剩粉總傷神含憤空中書咄咄攝魂畫裏喚真真屈指
偕居剛一載風催花落歸東海早知一別難再逢何苦分
襟貽後悔環珮聲遲恍惚來牽衣悲喜未疑猜淚傾一斛

鮫珠斷腸轉九迴。膩語哀曉鐘催醒。方知夢驚散彩雲堪
一痛。情感如遭鬼伯如魂歸。似有仙風送年來。書劒苦飄
零。安得終朝對娉婷。鐙殘孤館髮應白。鬼泣荒墳草不青。
將別叮嚀宛如昨。吞聲嗚咽淚先落。妾心貞比望夫石。郎
品高如立雞鶴。興懷觸緒不勝悲。記得生平當告誰。簾前
鸚鵡猶傳語。檻外青山想畫眉。寫就相思書一紙。焚向瑤
池青鳥使爲言。別後損腰肢。此心不改如江水。眞容合把
妙香薰。千古鍾情孰似君。紅顏種恨畱紅豆。綠萼成仙化
綠雲。綠雲琴瑟詩曲無不通。曉臨絕口占二詩。曾紀其二
焉。